

# Roma

## Paulo Ryberiti Roma mahãdu-ò

**1** <sup>1</sup>Paulo jiarĩ rare, tyyritiwidỹdure wahe. Jiarĩ heka Jesuisi Kristu deòdu rare. Tii riwatare rybe tỹnydỹdumy ararekremy. Deuxu Rybewihikỹ wahidỹdumy ararekremy. <sup>2</sup>Juhuu dori Deuxu rarybere Rybewihikỹ riwahinykemy. Deuxu rybedu mahãdu kia rybe riritinyre, Ritidỹnatyhy-ki. <sup>3</sup>Kiamy heka Deuxu Riòre rybe tyhydỹnamy rarybere, Davi riòre riòkòreò wahe. <sup>4</sup>Deuxu Jesuisi Kristu rubu-ribi riixixadỹnyreu, tariòremy tahe riteòsinyre rurunatyhy-di. Jesuisi tahe inatyhymy Inynryĩ ihỹre. <sup>5</sup>Tii ruxetòena inydeereny riwahinyre. Irybe òraru-ki, jiarỹboho aròirenykemy watzireri. Ityhyna aritỹnynykemy judeukòdu mahãdu-ò, tai tiibocho rityhynyrenykre. <sup>6</sup>Kaibocho tule judeukòdu mahãdu atxitenyteri. Tahe Deuxu ityhydỹna mahãdu atxitenyteri, Jesuisi Kristu ijoimy rỹirakemy adeereny rarybereki. <sup>7</sup>Ibutumy adeereny warybe rewahinyre, Kia Deuxu taijoimy remyremy mahãdu wahe. Ruxetòena, ywina-wana adeereny-ò kanakemy watzireri, Deuxu inytyby-ribi tule Jesuisi Kristu iny wedu-ribi. Tii dori adeereny irybe riwahinyreki.

<sup>8</sup>Umyreny Deuxu-ò reàlamahãre, atyhynareny-ò iny ibutumy roholamyhỹreki. <sup>9</sup>Deuxu-ò rexitòenymahãreu, anirenymy rarybehymy watziwãhãre. Kia heka Deuxu rieryre, waworibityhy tahe jiarỹ Deuxu deòdumy rare. Iriòre Rybewihikỹ-di wahe. <sup>10</sup>Jiarỹ rexitòenyhy watziwãhãre arorarenymy arakemy Deuxudeewikeki. <sup>11</sup>Umyreny arobikemy watzireri, tai adeereny arelyykemy aõmydỹ wihikỹ Deuxu Tyytybytyhy. Tule kaibocho wadee tuu belybybenykre. Tai tahe atyhynareny-ki ityhymy relekre. <sup>12</sup>Jiarỹ arawìhenanykemy watzireri, tule kai biwawìhenanykemy watzireri. Tai rikexideysanytyhykemy inatyhyna-ò. <sup>13</sup>Sòwemy heka arahyykemy watziwãhãre arorarenymy. Iribi nohòti losaõmy tahe wadi rarurunymyhỹre aõbo, riwateònyõhymyhỹre heka. Jiarỹ Deuxu dee waaõmysỹdỹna awikemy watzireri ayreny-ki. Tai kaibocho ako-ò boikemy wadee awire, iwese ijõ judeukòdu mahãduko-ò ararybekremy watzireri wese. <sup>14-15</sup>Tuheka ibutu iny-ò ararybekremy watzireri, hãwã witzira witzira mahãdu-ò, tule. Iny mahãdu-ò aõkòre mahãdu-ò tule. Tuu ariwinykre ibutumy iny-ò,

iny bedeeryrenyõ mahãdu-ò tule. Adeereny tule Rybewihikĩmy arelyykemy watzireri Roma hãwã ludu mahãdu-ò.

<sup>16</sup>Jiarĩ dori Kristu Rybewihikĩ-ki araixĩruõtyhy. Irybe dori Deuxu ruru rare. Ibutumy iny rityhynykeki ritakemy ratxikre. Judeu mahãdu-ò juhuu nade tai tahe iuhe-ò judeukõdu mahãdu-ò. <sup>17</sup>Deuxu õbitina ratĩnynymy namyhĩde Rybewihikĩwo-ribi. Tyhyna-di ritelenyre tule tyhyna-di ihĩmyhĩre. Inyõ tyhyna-di õbitimy rĩikeki, tii ruruõtyhy, idi awim� rareki.

<sup>18</sup>Deuxu yarana biu-ribi namyhĩde ibutu òraruna hudunamy. Iwidĩyĩdu hudunamy. Bina widĩyĩdu dori inatyhyna ribinanymyhĩre, raruinymyhĩre Deuxu rybe ribynymyhĩre? <sup>19</sup>Deuxu eryna ibutumy iny-ò riwahinyre. Deuxule tamy riwahinyre. Tai timybo Deuxu raremy tahe tiiboho rieryhymyhĩre. Tai Deuxu aõhõkĩmy risĩnymyhĩrenyre. <sup>20</sup>Juhuhukĩle heka Deuxu aõmydĩnanamy iny robimyhĩre idi tii tyhynamy tule rierymyhĩre itĩnyhĩkĩlemy, irurunahyy wahe. Aõu aõu kia ibutumy iny rierymyhĩre, Deuxu widĩynamy iny robireki wahe. Tai tiu iny ixitxiõdĩyĩna. <sup>21</sup>Rierenyre tii Deuxumy raremy. Tahe rexiwowydynyõhyre timybo iny Deuxu dee rexiwowydynymyhĩkemy wahe. Tamy àlanatyhy riwahinyõhyymyhĩre. Idi rõhõtinyrehyrenyre Deuxu irayky rõhõtinyrehyre wesemy idi rõhõtinyrehyre. Irayky tahe reõsamy ratximahãre. <sup>22</sup>Tiibohole bedeerytyhymy ixidi rõhõtinyrenyra. Tahe itxĩtele roire. <sup>23</sup>Deuxu rubutere rityhynykenawi tahe tiiboho heka ritxoo deuxuõ ireije riwinymyhĩrenyre tatyhydĩynamy. Ibinamy heka mywese riwinymyhĩre, nawii wesemy, irõdu wesemy, irõdu bedemy riradu-wesemy. Rexiõkamy riramy riradu wesemy tahe rityhynymyhĩrenyre.

<sup>24</sup>Deuxu heka òraruna-ò riwahinyrenyre, itxĩtenareny òraru-ki. Iny òta òtadu mahãdu heka wiwanale aõða ixĩruna riwinymyhĩrenyre. <sup>25</sup>Deuxu inatyhyna dori tiiboho riwiurõnyra ruina-ò. Ritxoo dee rexitõenyrenyre, aõbo Deuxu riwinyre, kia. Deuxule iny reàlàkõmyta ratximyhĩrenyre.

<sup>26</sup>Deuxutyhy tahe rityhynyõhyre, Deuxu ibutu widĩyĩdu tiu riteàlanymy rakonananyõtyhy. Kia òraru-ki òtaõtana nade. Hãwyy, hãbu-wana aõkõ roimyhĩre wideele heka aõhebo rotĩynymyhĩre. Kia heka õbiti aõkõ rare. <sup>27</sup>Tule hãbu, hãwyy-wana aõkõ rõimyhĩre, wiwanale aõhebo rotĩynymyhĩre. Òbiti aõkõ heka kia rare. Riwyrenykre kia òraru òwydĩyĩna, aõhõkĩmy dĩyĩnana wahe. Iny sohoji sohoji taaõbina ixĩruna òraru-ki ixidee rimykre.

<sup>28</sup>Tõhõti heka Deuxu-txi reaõhyymyhĩre. Tai tahe timybo ixideewim� riwinyrenykemy roirenyre Deuxu-ribi. Tahe riwinyrenyre ibutumy aõbina binahakĩle. <sup>29</sup>Aõim� aõko ratximyhĩre aõbina bina-di roiremyhĩ: òtaõtana-di, aõbina binahakĩ-di, aõikõkõ-di, rarekemy ixidee ririmyhĩre, teramy heka rĩira. Ihãru-di rĩira iny rubudĩyĩmy dori rõhõtinyrehyre, rarybehymy ratxirerim� ihĩre, ruidu nihikĩ ihĩre, ujõmo-di rĩira. <sup>30</sup>Aõbinamy inymy rarybemyhĩre, Deuxu derare, ixiluulerenyre, rexityhynymyhĩre, òraru tĩmyra riwinyrenyre, tyby tadi-wana rityhynyõhyre. <sup>31</sup>Irybe sohoji aõkõ heka rare. Iluunaõre, ibinatyhyre, inydee iruxetõeõre. <sup>32</sup>Deuxu rarybere: inyõ kia

riwinykeki heka ruruke. Tiiboho kia rieryrenyre. Ihãre tahe aõhebo rotỹnyre. Kia sohojile aõkõ. Reysarenymyhõre iny wixira iherenyki aõhe rutỹnykreki.

**2** <sup>1</sup>Tutyhy-ki aõkõramy rybeõmy. Kai dori tutyhyle òraru tewinymahãte. Inyõ rybemy ywisidỹna ijõmy rarybeke-wana ixilemy ywisidỹna-ò rexythyenye. Tii dori kia ibutumy tule riwinymyhõre ibinamy wahe. <sup>2</sup>Inyõ kia aõbina binahakỹ riwinymyhõkeki, Deuxu ywisidỹna-ò inatyhynalemmy tamy kòdòhònykre. <sup>3</sup>Kai tuleke — kiamy biwinykeki, Deuxu ywisidỹna-ribi mahenyõtyhy. Kai dori ywisidỹdumy texidedsinyte ihãre tahe iòraru wesele tewinymahãte. <sup>4</sup>Deuxu ruxetõena sówemy adi rexiruxetõenanymyhõre. Kia-di bexirãhikemy adi ratxireri, tiemy ywimy aõna aõna bina riemyhõre ratximyhõre, awi heka adee rare. Kai aõbohe iribi õhõti rosakre kia heka arabedeòtiidỹnymyhõre. Arabedewodỹnymyhõre iòraru-ki. Kai aõbohe kia teeryõte? <sup>5</sup>Kai arybedỹsaeryõre rybe ijohona teeryõte õhõtiõre. Tai tahe Deuxu yarana ixideele tebutunymahãte. Ijõtxu Deuxu yarana txumykreu. Tai Deuxu ywisidỹdu òbiti rexitỹnynomy rỹikre. <sup>6</sup>Iny sohoji sohoji taaõna aõna myna aõmy rotỹnykre, aõhebo rotỹnymyhõreki wahe. <sup>7</sup>Inyõ aõwidỹylemy ratximyhõre. Tiiboho heka Deuxu wowydyna, Deuxu wohyna, Deuxu loosõna widỹmy rarutaamyhõrenyre. Tule iny rarehykykrena-di rarutaamyhõrenyre. Imyna Deuxu tamyreny riõkre. <sup>8</sup>Kia ixidile rõhõtinymyhõre mahãdu tahe, Deuxu woxibrunale, yaranale ritakre. Tiiboho dori inatyhyna rityhnyõhyomyhõrenyre, aõ òbitile aõkõ riwinymyhõrenyre. <sup>9</sup>Aõhõkỹmydỹnana, bedewona kanakre ibutumy aõbina bina widỹdu mahãdu-ò, judeu mahãdu-ò juhuu idi judeukõdu mahãdu-ò. <sup>10</sup>Wowydyna, àlãna, ywina tahe kanakre aõwiwihikỹ widỹdu mahãdu-ò judeu mahãdu-ò juhu delemy idi judeukõdu mahãdu-ò. <sup>11</sup>Deuxu-ò heka ibutumy iny wiwese rare. <sup>12-16</sup>Tii heka aõhõkỹmy risỹnykre ibutumy iny òrarudu mahãdu. Moisesi bede ywina ihoõrehãrele tii rurukre. Judeukõdu mahãdu heka Moisesi bede ywina rybe ijõkõre. Tahe bede ywina iny rierykeki, idile Deuxu iòraruna riwinykre. Inyõ Deuxu bede ywina rybe roholare tahe rityhnyõre, kia tahe Deuxu dee ibinatyhyre. Ibutumy kia iny rurukre, õtỹy iraykywokile aõbo ibinare, aõbo òbitire rierymyhõreki. Deuxu bede ywina wesemy heka iraykywo-ki ratximyhõre. Iraykywydyna rexinohõtinymyhõre ada dexiòbitidỹnymyhõre, Rybe wimy rarybemyhõre Jesuisi Kristu heka hãbu aõmydỹna ritỹnynykre imyna timy rarekremy. Deuxu dori iteradỹdure.

<sup>17</sup>Kaiboho, judeu mahãdu, texinohõtinytenyta ibutumy awiremy aDeuxureny-wana. Tii adeereny bede ywina rybe riwahinyreki, tii abiõwatyhy rareki. <sup>18</sup>Kai heka aõbo Deuxu-ò awire teeryte. Aõbo ibinare, teeryte. Uladuule ibede ywina rybe teeryte, tai òbitityhyle adeereny awire. <sup>19</sup>Kai Deuxu-ò nonana bitỹnynyke iny ruetã mahãdu-ò dori, kia teerytyhytenyteki. Ixi-di tahõtinytenyteki. Iwese, kaiboho loosõna wesemy toitemahã ixi-di tahõtinytenyte. <sup>20</sup>Tule kia ixi-di tahõtinyamahãte. Kai bede erydỹdukõdu mahãdu erydỹdumy atxiterimy ixidi tahõtinyamahãte. Uladu erydỹdumy atxiterimy ixi-di tahõtinyamahãte. Kai bede ywina rybe tyyritiõ dire. Kia adee ibutumy

inatyhyna rare bedeerydÿÿna. <sup>21</sup>Kai iny erydÿÿdumy atximahâte. Timyrekibo kai textierynanyõmahâte. Kai wasimy aõkõ tõerydÿÿnanymyhÿte. Timyrekibo tawasinymahâte. <sup>22</sup>Kai hãwyy òta aõkõ tetÿnynymahâte. Timyrekibo kai tuu tatÿÿnymahâte. Suritxoo dee àlàna deramy iximy tarybemahâte. Aõherekibo erydÿÿ-ribi aõmydÿÿnana tewinymahâte. <sup>23</sup>Kai bede ywina rybe luumy iximy tarybemahâte. Kai Deuxu-di texixiwedenymyhÿte. Ihãre tahe bede ywina rybe tetyhynyõte. Kiawese Deuxu texirudÿÿnymyhÿte. <sup>24</sup>Iwese juhuu riritinyre wese wiji roimyhÿre: —Aðraru-ki tahe bedemy iny rÿira Deuxumy aõna aõnabinamy rarybemyhÿre. <sup>25</sup>Kai bede ywina rybe bityhynykeki, õtyky resynadike, awire judeu mahãdu dori rare. Tahe bede ywina rybe bityhynyõkeki, õtykyresyna adee aõ aõkõre. <sup>26-27</sup>Iwesityhylemy iny rare tõtyky resynaõ mahãdu. Tiiboho bede ywina rybe rityhynykeki, tõtyky resyna-di mahãdu wesemy roirekre. Judeukõdu mahãdu heka bede ywina rybe rityhynykeki, kia adee ixÿruna rare. Kaiboho dori Deuxu bede ywina rybe tetyhynyõte õtyky resyna dire hãrele. Bede ywina rybe dire hãrele. <sup>28-29</sup>Inyõ judeu mahãdu wesemy ihÿre. Ihãre tahe judeu mahãdu inatyhy aõkõ rare. Tõtyky resyna-di judeu mahãdu inatyhy aõkõ rÿira. Judeu mahãdu inatyhy tawokihyyle kia idi rÿira. Iwesele notyky resynadÿÿna kia rÿira. Inywokihyyle rare. Aõ bede ywina rybekile aõkõ tuu rÿire inrayky wydynamidle kiawesemy inyõ rÿira. Hãbu-ribi wowydynamy ritaõtyhy. Deuxu ribile ritake.

**3** <sup>1</sup>Tibohe judeu mahãdu deewinare. Notty resynale tamywina. Kia aõbo ibuturatyre awire judeu mahãdumy rareki? <sup>2</sup>Inatyhy rare, sõwemy, Deuxu dori tamy juhu Ritidÿÿna riwahinyre. <sup>3</sup>Inyõ rityhynyõre-wana kia riwiurõnyõhyymyhÿre Deuxu heka õbiti rare. <sup>4</sup>Inatyhy urenanamy Deuxu raremyhÿ. Iny mahãdu tahe roidumy rÿiramyhÿ. Iwese ritina-ki roire wese Deuxumy rarybereri: —Kai arybe õbitina-di atximahâte urenana wahe. Inyõ araurihikeki, kai inatyhyna-di biòlòdÿÿnykre. <sup>5</sup>Inyboho õbiti aõkõ roire. Kia tahe Deuxu õbitina riteõsinyre. Timykibo Deuxu inydee aõhõkÿmydÿÿnana riwahinykre. Mobo heka kia õbitimy aõkõ rarybekre. Jiarÿ hãbu rayky-di wese rarybereri. <sup>6</sup>Kia õbiti rare. Kiaweseõkeki timybo Deuxu bede aõhõkÿmy dÿÿnana riwahinykre. <sup>7-8</sup>Kai tarybete: —Jiarÿ raruirã. Urile kia Deuxu inatyhyna reteõsinyre. Aõherekibo Deuxu aõhõkÿmy riwasinyre. Kiarybe iwitxira rybewesemy rare: —Ibinamy rakatximyhÿkeki, awihikÿ kia-ribi ròhònykre. Aõkõre, kiamy rybedu mahãdu aõhõkÿmy dÿÿnana ritamyhÿkre. Kia riki wamy rarybere, ruimy wahe.

<sup>9</sup>Aõhe aõbohe, inyboho aõbo inywitxira-ribi awityhyrenyre. Aõkõre. Jiarÿ reteõsinymahãre ibutumy judeu mahãdu, judeukõdu mahãdu ibutumy òrarudu roire. <sup>10</sup>Kiamy Tyyriti-ki roire: —Tiu heka inyõ õbitiõre. <sup>11</sup>Inyõ heka Deuxu rieryõhyymyhÿre. Timy heka riòryõhyymyhÿre. <sup>12</sup>Ibutumy iny rexiõnonymyhÿre Deuxu-ribi wahe. Aõmy aõkõ tiiboho rexiwinyrenyre. Iny riueõhyymyhÿre aõbo awiré. Sohoji aõkõ aõhebo rotÿÿnyre aõbo awiré. <sup>13</sup>Ibòtòjò heka rubuwabede iramy roimyhÿre ròwese rare. Tiiboho iny itxenadÿÿdu rare. Irybe heka hemylalatyhyju wese rare. <sup>14</sup>Aõbina binahakÿlemy heka inymy

rarybemhÿre. <sup>15</sup>Iti heka teyrewa rare hâlubu txiwimy iny rubudÿÿmy tule. <sup>16</sup>Titxibo ramyhÿre-wana heka aõbina binanale riwahinymhÿre, aõhõkÿle ririmyhÿre. <sup>17</sup>Tiiboho dori ywimyno rieryõmyhÿrenyre. <sup>18</sup>Deuxu lau heka ruberuõtyhymhÿrenyre, Deuxu rityhynyõtyhy.

<sup>19</sup>Bede ywina rybe heka tatyhydÿÿna mahãdu-ò diõde. Kia tahe inyboho rieryrenyre. Tai heka iny rexitxiõnyõtyhy Deuxu-ò. Tai heka ibutu dee aõhõkÿmy dÿÿnana-ò riywinymy rÿikre. <sup>20</sup>Bede ywina rybe-ribi iny ibutumy rieryre ibinamy ratxireri. Inyõ heka bede ywina rybe heka rityhynyõhyre. Tai tahe inyõ kia-di rexitaõtyhy iywina òraru-ki.

<sup>21</sup>Wiji tahe Deuxu òbitina ratÿnynymy ihÿre bede ywina rybe-ribi lahitximy. Ihetxiu rybedu-di kia ritÿnynymy ihÿre bede ywina rybe ritina-di. <sup>22</sup>Deuxu riòbitidÿÿnyra. Ibutumy Jesuisi Kristu tyhydÿÿdu kanakre. Deuxu dee dori ibutumy bede bede ludu wiweselere. <sup>23</sup>Ibutumy raòrarunymhÿre. Deuxu òbitina tamy rauhenymhÿre. <sup>24</sup>Deuxu taruxetðena-di ibutumy riòbitidÿÿnyre Jesuisi Kristu tarasadureki. Tii iny-ribi iòwydimy aõ rexitðenyõhyre. <sup>25</sup>Deuxu Jesuisi-di rubuna iny òraru riixãwididÿÿnyre iòwy tii riòwynara, iny kamy rityhynkemy. Kawese-ki Deuxu òbitina ritÿnyryra. Juhuu Deuxu iny òraruna-ò reteheõmyhÿre aõnityhymy iywisidÿÿna direki. <sup>26</sup>Tahe wiji inyòraru-ò retehemyhÿre riixãwididÿÿnykemy. Tai tahe tii òbitire tule Jesuisi Kristu tyhydÿÿdu òbitidÿÿdure. <sup>27</sup>Mobo Deuxu-ò rarybekre jiarÿ awiremy? Aõkõre, inyõ rarybeõtyhy. Bede ywina rybe tetyhynyõte. Deuxu iny òbiti widÿÿdure, ibede ywina ywidÿÿ aõkõre. Inatyhynadile awityhymy iny rare. <sup>28</sup>Kiamy tahe raraykynyre iny ityhynadile riòbitidÿÿnyke bede ywina rybe ywidÿÿ aõbo? Aõkõre! <sup>29</sup>Deuxu aõbo, judeu mahãdu Deuxu sohojile rare? Aõkõre, judeukõdu mahãdu-ò tule Deuxu ihÿre. <sup>30</sup>Deuxu sohojile rare. Iny wiwanale riòbitidÿÿnykre judeu mahãdu judeukõdu mahãdu-wana. Ibutumy ityhyna òraru-ki riòbitidÿÿnyke.

<sup>31</sup>Ityhyna aõbo bede ywina rybe riixãwididÿÿnyra? Aõkõre, bede ywina ihãre rÿire.

**4** <sup>1</sup>Timybo ararybekre inytybyreny Abraõmy. <sup>2</sup>Aõbo riwinyre aõkõ idi rexiòbitidÿÿnyre. Tai tahe rexityhynyke inyko-ò. Tahe Deuxuko-ò aõkõ. <sup>3</sup>Kamy heka Ritidÿÿna-ki roire: —Abraõ heka Deuxu rityhynyre taile tahe rexiòbitidÿÿnyre. Deuxu dee tii òbitityhy rare tii rityhynyreki. <sup>4</sup>Iny aõmysÿdÿÿdu raòwymyhÿke iaõmysÿdÿÿna myna. Urimy aõkõ dori raòwymyhÿre taaõmysÿdÿÿnaòwyle dori ritamyhÿre. <sup>5</sup>Inyõ rityhynymhÿkeki, tii òbitina ritamyhÿre Deuxu-ribi. Deuxu dori òrarudu mahãdu òbitina widÿÿdu rare. Kia uriõno rare. <sup>6</sup>Davi heka juhuu riritinyre iwese teysatyhymy iny rarekremy wahe. Deuxu dori òbiti mahãdu dee riraykydÿÿnyre òbitimy roirekemy. Tii ixidee aõ riwinyõre. Davi kiawese riritinyre: <sup>7</sup>—Teysatyhymy iny rÿirakemy Deuxu iòraru riixãwididÿÿnyreu tõhõti-ribi iòraru rosakeu. <sup>8</sup>Teysatyhymy iny rÿirakemy iòraru-txi Inynyrÿ nohõti ijeraõmy ihÿkre. <sup>9</sup>Deysana aõbo judeu mahãdu sohojile

riteysanymyhÿre ida judeukõdu mahãdu tule. Tulere! Inyboho dori rarybere: —Abraõ tyhynale tamy òbitina diwahinymyhÿde. <sup>10</sup>Tiubo tahe Abraõ òbitina ritare notyky resynako-ki ada ihewo-ki aõbo, ikoure. <sup>11</sup>Juhuu dori rityhynre idi ta notyky resyna tamy nade kia tyhyna Deuxu-ò ritedsinyreki. Tai tule òbitina Deuxu tamy riwahinyre. Kia butu tyhydÿÿdu tyby wese rare, Judeukõ mahãdu wahe. <sup>12</sup>Notyky resynako-ki òbitina ritare. Tõtyky resyna-di mahãdu tyby wesemy riki Abraõ ratximyhÿre. Tiile tõtyky resynakõ-ki Deuxu rityhynytyhymyhÿre. <sup>13</sup>Deuxu Abraõ-ò rarybere tii ibutu bede bede wedu wesemy ratximyhÿre iriõre iribi rimykemy. Tahe bede ywina rybe òraru-ki aõkõ tuu ihÿre, ityhyna òbitina òrarukile wahe. <sup>14</sup>Bede ywina rybe-ribi tybie tahe itarasadumy ratxikre, tai tahe inatyhyna aõ aõkõ rare. Aõbo Deuxu rarybere aõmy aõkõ rare. Tahe roirekre. <sup>15</sup>Bede ywina rybe dori Deuxu aõhõkÿmy dÿÿnana diõde iny ribedeerynkemy. Teysana aõkõ wahe. Bede ywina rybekõki, timyki iny aõ ityhynyõna. Bede ywina rybe ijõõre-wana òraruna ijõõre. <sup>16</sup>Tahe inatyhyna-di sohojile iny aõna aõna wiihikÿ ritamyhÿke. Tai iruxetõena-ribi nade. Tahe aõmybo Deuxu rarybere ibutu riõrerìõremy tuu rÿikre. Bede ywina rybe mahãdu tule bede ywina rybekõdu mahãdu-wana wiwana Deuxu rityhynre. Abraõ riõre wesemy ibutumy tai inyboho roire. <sup>17</sup>Iwese Ritina-ki roire wese: —Jiarÿ aratare ibutu inytyby wesemy mabekemy. Ibutumy iny rityhynre-wana, iwese Abraõ rityhynre wese, iwese-ki Deuxu ritake. Deuxu tahe rubu mahãdu riixixanymyhÿre rubu-ribi. Tii rarybekeu aõ aõkõ aõwesele tii aõ heka rare. Tii rarybere tule riwinyre. Abraõ heka Deuxu rybe rityhynre. <sup>18</sup>Timy heka rariõrenykemy ixidee röhõtinyõhyymyhÿre. Deuxu dori tamy rarybere: —Kai heka ariõkõrereny sówemy atximyhÿkre. Kai hãwã hãwã tybimy mabekre. <sup>19</sup>Abraõ tatyhyna ritxiõnyõhyre. Timy heka 100 beõramy idi ratximyhÿre, ixãwire uladu-ribi ramatuarinyreki. Tule ihãwyy Sara iuladu herina-di kõremy röhõtinyre. <sup>20</sup>Timy heka ritxiõnyõhyre Deuxu Rybe. Rityhynymyhÿre Deuxu dealãna riwowydnyre. <sup>21</sup>Tii heka rierymyhÿre Deuxu irurudire irybe wesemy aõ rÿikemy. <sup>22</sup>Tai tahe Deuxu tamy òbitina tamy diwahinyde. <sup>23</sup>Aõ òraruki aõkõ kia ryberitina awimy raeryre, tamy sohojile aõkõ dori rarybere. <sup>24</sup>Iny òraru-ki tule kia tuu roire. Iny tule inatyhyna-di òbitina ritakre. Inyboho dori rityhynymyhÿre, Inynyrÿ Jesuisi rubu-ribi ixixana widÿÿdu Deuxu raremy. <sup>25</sup>Jesuisi iõludu-ò iwahidÿÿmy rara inyòrarureny-ki tai rurure. Tahe iny òbitina wahidÿÿna-ò diixixanyde rubu-ribi.

**5** <sup>1</sup>Jesuisi tyhydÿÿ òraru-ki Deuxu inyboho rimyrenyre. Idi awimy rokoirekremy tii-wana, Jesuisi Kristu-wana wahe. <sup>2</sup>Deuxu ruxetõenawo-ki inyboho rotamanymyhÿrenyre. Jesuisi Kristu tyhydÿÿna òraru-ki tamy rotamanymyhÿre. Deuxu loosõna worojuxana-ò-di rokoirekre. Tai inyboho reysamy ihÿre. <sup>3</sup>Inyboho bedewona-di hyy ihÿrenyre. Ihãrele tahe inyboho teysarenre. Kia dori iny riwiõhenynymyhÿre rarõsõna ijõdikemy ruru inydeereny riwahinykemy. <sup>4</sup>Inyboho rikiiijerenyhykeki, Deuxudeewimy rikiwinyrenyke. Deuxudeewina rikiwinyrenykeki, rarõsõna rikitarenykre. <sup>5</sup>Iny rarõsõna tarasana aõkõkeki, uritere rakabedewoõtyhy, Deuxuluuna dori inywo-ki ratxireri. Deuxu

Tyytybytyhymy inydeereny wahidỹỹna rare. Tii dori inyworeny-ki Deuxuluuna ritidire. <sup>6</sup>Iruuõmy inyboho roiremyhỹre awimy riwinykemy. Tai tahe Kristu inydeereny, inyboho ibinare hãre rurure, Deuxudeewireu. <sup>7</sup>Isirare inyõ hãbu õbiti dee ruruke. Tahe hãbu wiwihikỹ dee õsana iny rurukre, kia heka irutaõre. <sup>8</sup>Deuxu tahe luunatyhy inydeereny diteõnyde. Iny õrarudurenre hãre, Kristu inykireny rurure. Juhuu heka inyboho õrarudu roire. Ihãrele Deuxu taluuna nihikỹ inydeereny diteõsinyde. Tai heka Kristu inyõrarurenre-ki rurure. <sup>9</sup>Irubuna õraru-ki heka Deuxuru-õ inyboho õbitimy ihỹrenre. Irubuna tahe kia riwinyreki irumy inonana tahe iratyre rarekre inydeereny wahe. Deuxu ykarana-ribi Kristu dori iny ritamyhỹre. <sup>10</sup>Juhuu Deuxu õludu inyboho roire. Tahe wiji ibiõwamy inyboho roire, iriõre iny õrarurenre-ki rurureki, wahe. Wiji tahe rybe õludu mahãdu-ribi wiutãðanamy rỹire. Ibutu kia heka Kristu õraru-ki sohojile ture. Tai iny teysamy roire Deuxu rityhynyreki. <sup>11</sup>Inyboho heka iwitxira Deuxu-wana ratximyhỹrenre. Tai tahe reysamy ratximyhỹre. Inyboho Deuxu biõwamy ratximyhỹrenre. Jesuisi Kristu Inynrỹ õraru-ki heka ture.

<sup>12</sup>Hãbu sohoji õraru-ki õraruna bede-ki ralore juhUU, Adaõ õraru-ki wahe. Taile tahe rubu nade bede-ki. Idi ibutumy iny raðrarunre. Adaõ õraruna-txi resereu, rubu ibutumy iny-õ resere. <sup>13-14</sup>Juhuu Adaõ rurure. Iribi tahe ibutumy iny rurure. Moisesi tule rurure. Tahe bede ywina õraru-ki aõkõ tiiboho rurure. Bede ywina dori Adaõ rubu hewo-õ Deuxu riwahinyre Moisesi-õ. Deuxu heka iny õrarunamy aõkõ rõhõtinyre, tabede ywina dori kiau riwahinyõre. Adaõ heka Deuxu rybe rityhynyõre, tai tahe rurure iwese Deuxu rarybere wese. Tule iõraruna õraru-ki ibutumy iny raðrarunymyhỹrenre. Adaõ heka Jesuisi-õ rakewesenanykre. <sup>15</sup>Tiiboho wiwanale aõ kabede-õ aõ diwymyhỹdenyde. Adaõ heka rubu diwyde. Jesuisi heka runa diwyde. Adaõ heka sõwemy iny-õ rubu riwahinyre. Jesuisi tahe sõwetyhy-õ Deuxu ruxetõena riwahinyre, tarasana tamyreny riwahinyre. Òraruna sohoji-di heka Adaõ rubu riwahinyre ibutu iny-õ. Jesuisi tahe ibutumy iny-õ biu-õ hena riwahinykemy ratxireri iõraruna sõwere hãrele. Umytuedeõna wahidỹỹdu tii ratxireri. Kia awityhyre. <sup>16-17</sup>Inatyhymy Adaõ widỹỹna ibinare. Jesuisi widỹỹna heka awityhymy rare inydeereny. Inyboho dori Jesuisi-wana irumy ratxirenyre aõu aõu kowa bede wihikỹ-ki, Deuxu õraru-ki. <sup>18</sup>Aõhõkỹmy dỹỹnana heka Adaõ widỹỹna diwyde ibutumy iny-õ. Jesuisi tahe õbitina diwyde ibutumy inydeereny. <sup>19</sup>Adaõ heka Deuxu rybe rityhynyõre. Tai iny sõwemy õraruna-txi resere. Jesuisi tahe Deuxu rybe rityhynyre. Tai iny sõwemy heka õraruna-ribi ritare. <sup>20</sup>Deuxu tabede ywina rybe riwahinyre. Tai tahe iny aõbina rierymyhỹre. Òraruna-di sõwemy ihỹreki, tai Deuxu ruxetõena sõwetyhymy ihỹre. <sup>21</sup>Juhuu õraruna ratximyhỹre iny umyreny-ki. Inydeereny rubule riwahinyrenre. Wijile tahe Deuxu ruxetõena riwahinyre inyumyreny-õ, inyraykyreny-õ. Òbitina inydeereny riwahinyre Deuxuko-txi. Jesuisi Kristu Inynrỹ õraru-ki heka, umytedeõna inyboho ijõdire.

**6** <sup>1</sup>Timykibo Deuxu inydireny rexiruxetõenykeu watxireri Deuxu ire inydireny raruxetõenykemy ire rexiõrarunanymyhỹre hãrele. Timyki



tuuõna. <sup>2</sup>Aõkõhyyre. Inyboho heka òraruna dee rubumy ihÿrenyire. Timykibo iny ihyymy òraruna-txi rekeseke? Aõkõhyyre. <sup>3</sup>Jesuisi Kristuni-ki inyboho raratisebenyreu, Tule Jesuisi rubu-my ratisebe-ò rururenyre. Kia teerytenyete. <sup>4</sup>Tiu inyboho risebenyire Jesuisi òraru-ki, tii-wana inyboho rurure. Tai iru tÿmyra-di inyboho ihyre. Iwese Deuxu taruru-di Jesuisi riixixadÿÿnyre wese tule inyboho iru tymyra-di rokoireke. <sup>5</sup>Iwese tii rurure wese, inyboho tule rukurenkyre òraruna dee. Iwese Kristu rexixadÿÿnyhe wese inyboho tule òraru-ribi ixãwira tii-wana rarehyykremy. <sup>6</sup>Iny umy tyby tule rurure Kristu itxed-ki. Tai inyboho heka òraruna deòdumy aõkõ ihÿrenyire. <sup>7</sup>Inyõ rurukreu, tii òraruna-ribi ixãwimy ihÿre. <sup>8</sup>Inyboho Kristu-wana rurukeki, tii Kristu-wana irumy ratxikre. <sup>9</sup>Kristu rexixare tii ixyby ruruõtyhy. Rubu ixyby tamy reaõtyhy. Kia tahe inyboho rierenyre. <sup>10</sup>Jesuisi rurureu, iny òraruna ixãwina rubulemy rurure. Wiji tahe irumy ihÿre Deuxudeehy. <sup>11</sup>Tule kai arumy atximahãte Deuxu dee iny aõbina bina-ò taruteki rubuwesemy arumy tahe Deuxu-ò. Inynyrÿreny Jesuisi Kristu tyhydÿÿki. Kiawesele mohõtinyke Deuxu dee, Jesuisi Kristu dee wahe.

<sup>12</sup>Kaiboho dori Jesuisi Kristu-wana atximahãtenyete. Òraruna-txi ixyby besekeõtyhy. Ixideewimy aõkõ rikiwinyrenyke, aõ ibina wahe. <sup>13</sup>Aumyreny biwahinybenyke Deuxu-ò iwese iny iru tÿmyra-di ihÿrenyire. Tai tahe õbitile biwinybenyke, òraruna-txi beseõtyhy aõ iyja aõkõ. <sup>14</sup>Òraruna rybe-ò ijohorenyõmy. Tii dori awedu aõkõ rare. Deuxu ruxetõena-ò bexiweloromahãbenyke.

<sup>15</sup>Aõbo tahe awityhyre. Ruxetõena òraru-ki aõbo rekexiòrarunymyhÿke. Aõkõhyyre. <sup>16</sup>Òraruna rybe-ò heka bityhynybenykeki, òraruna deòdumy atxibenyke, rubu iòwy rare wahe. Deuxu rybe-ò tahe bityhynybenykeki, õbitimy boibenyke. Bexideòdunybenyõtyhyke òraruna bityhynybenykemy. <sup>17</sup>Wowydyna Deuxu-ò kanakemy watxireri. Juhuu kaiboho òraruna deòdumy ahãtenyete. Tahe wiji inatyhyna erydÿÿna tetyhynytyhytenyete. <sup>18</sup>Wiji tahe kaiboho õbitina deòdumy atxitenyete. Tahe Deuxu deòdumy wiji toite, tii ixideewimy timybo adirenykre. <sup>19</sup>Iwese juhuu òrarunawidÿÿna-ò texiwahinymahãte wese, wiji bexiwahinybenyke Deuxu-ò, õbitiwidÿÿna-ò wahe. Òbitimy rarybemahãre, itÿnytyhy kaiboho dori õhõtitymy toite aiximynatyhyrenyõ òraru-ki. <sup>20</sup>Òraruna deòdumy atxitenyete, Deuxu tetyhynyõtenyete. <sup>21</sup>Kia aõmydÿÿnana wiji ixãruna adeereny rare. Aõbo tahe awimy juhuu tewinytenyete. Kia heka rubule riwahinymyhÿre. <sup>22</sup>Òraruna-ribi ixinamy atxitenyete. Kaiboho Deuxu-ò ibutumy texiwahinyete. Tai umytedeõna tetatenyete. <sup>23</sup>Òraruna òwy heka rubu rare. Inyõ òraruna riwinykeki, tii ruruke, kia òraruna òwy rare. Deuxu wahidÿÿna tahe umytedeõna rare, Jesuisi Inynyrÿ rurureki wahe. Idi tiile-wana tukre.

**7** <sup>1</sup>Waityhydÿÿdu seriòre, kaiboho bede ywinamy teerytenyete. Tai bieryke aõmybo ararybekre. Inyõ irulemy rariakekile, bede ywina tamy aõ rare. <sup>2</sup>Arawesenanykre. Hãwyy heka ihãbu-wana ihyymy ihÿre bede ywina myna. Hãbu rurukeki, tahe ixinamy ihÿre ijõ-wana roikremy. Hãbu ruruõkeki tahe, ixinamy aõkõ ihÿre, ijõ-wana roikremy. <sup>3</sup>Inyõ-wana roikeki,



hãwyy wedenamy raninikre. Ihãbu rurukeki, tii ixinamy rarekre. Ijõ-wana roike. <sup>4</sup>Kia wese rare, waseriðreboho, ayreny-ki. Kaiboho bede ywina dee tarutenynte. Kaiboho dori ityhydỹÿdu mahãdu atximahãtenynte. Kaiboho Deuxu hõrõ mahãdu atximahãtenynte. Rubu-ribi ixixadu mahãdu atximahãtenynte, Deuxudeewina biwinybenykemy. <sup>5</sup>Juhuu ixideewile aõ tewinymyhỹtenynte, rubu aõmydỹÿnana wahe. <sup>6</sup>Wijile tahe bede ywina-ribi ixinamy inyboho roimyhỹrenynte. Iwese ihetxiu tyriti bede ywina rityhynymy aõkõ ihỹreny, wiji Deuxu Tyytybytyhy aõmydỹÿnana inyboho rityhynyrenynte.

<sup>7</sup>Timybo? Bede ywina aõbo ibinamy rare. Aõkõre. Ihoõkeki tahe òraruna jiarỹ arieryõtyhy. Bede ywina rarybere wasiõmy. Kiale reeryre aõbo wasimy rare, inyõ aõ arimykemy watxireriu, kia òraruna wasiweselemy rare. <sup>8</sup>Timyki, jiarỹ òraruna waerysõna bede ywina tuu rarybekõkeki. Bede ywina dori aõbina binamy riwabedeerynte. <sup>9</sup>Jiarỹ juhuu bede ywina reeryõre. Reeryre tahe aõmydỹÿnana binale wadee rarerenynte. <sup>10</sup>Deuxu heka bede ywina riwahinyre juhuu. Tamy ruru riwahinyre bede ywina wahe. <sup>11</sup>Tahe bede ywina òraru-ki heka òraruna riwahinymy. Tai tahe õnosõna riwarubunynte. <sup>12</sup>Kia bede ywina tahe awi rare, õbiti rare. Õnosõna awi rare. <sup>13</sup>Timybo rare. Òbitina aõbohe riwarubunynte. Aõkõre. Òraruna tiire. Tii tahe ibinatyhy rare. Bede ywina òraru-ki iny kia òraruna ibinatyhy reeryrenynte. <sup>14</sup>Bede ywina heka Deuxu Tyytybytyhy aõmydỹÿnana rare. Jiarỹ heka inyle rare, òraruna heka wawedu rare. <sup>15</sup>Aõbo warayky dee ibinarele, kiale rewinywãhãre. Aõbo awimy warayky dee rare, kia rewinyõhyre. Aõherekibo? Reeryõre. <sup>16</sup>Rexierymyhỹre aõbo rewinymyhỹre. Reeryre kaa bede ywina awi rare. Tai heka rabadewomy watxiwãhãre. Jiarỹ dori bede ywina bede ywina riti reerymy watxiwãhãre. <sup>17</sup>Retxiõnymy watxiwãhãre. Waruruõhy heka watxiwãhãre. Aõwi ariwinykeõ. Òraru heka iõhõmy waribi ratximyhỹre waruru ratyrene ratximyhỹre waribi. Tai heka òraru rewinyamahãre. <sup>18</sup>Wauamy ehetsina tahe ibinatyhy rare. Aõbo awi rare heka ariwinykemy rewisyñywãhãre ta heka rewinyõhywãhãre. Aõwi rewinyõhyymahãre! <sup>19</sup>Jiarỹ rarurunymahãre heka aõbina ariwinykõkemy. Tahe ihãrele heka rewinyamahãre. <sup>20</sup>Reeryrehe aõhebo ratỹÿnymyhỹre. Jiarỹ ixidrarudỹÿ waðraruna wadi raitxỹteitxỹtenymyhỹre. <sup>21</sup>Deuxudeewimy heka ariwinykemy watxiwãhãre. Tahe araðrarunyhyymahãre. <sup>22</sup>Waumytỹmyra rarurunytyhymahãre Deuxudeewi widỹÿna ariwinyke. Awityhy rare wadee. <sup>23</sup>Ijõ tahe waumywo-ki, waraykywo-ki, ratximyhỹre, waumyehetsina waki ratximyhỹre. Wadi rarurunymyhỹre riwamymy ratximyhỹre. Aõbina widỹÿmy heka wadi rimymy ratximyhỹre. Reòludunyõhyymyhỹre waraykymy heka rahañnanymyhỹre. Aõwesele heka tuu rahañnanymyhỹre, riòludunyõmyhỹreki wahe. Raraykynymahãre warayky-ki, Deuxudeewimy watxikemy. Tule tahe reerymahãre òraruna deòduõ jiarỹ rare wahe. Waumytỹmyra tahe wadee rarybemyhỹre õbitimy aõmydỹÿnana ariwinykemy. Waumyehetsina tahe kialemy wadee rarybemyhỹre —òraru ariwinykelemy. <sup>24-25</sup>Tai heka urile warayky raleileinymyhỹ. Mobo riwatake waumyehetsina bina bina

aõmydÿynana-ribi? Deuxudeewina-ki, Jesuisi Kristu Inynyrÿ heka iximynamy riwatakre. Tii riwateõnyny wadi rarekre. Wowydyna tamy ariwahinykre.

**8** <sup>1</sup>Tai heka Jesuisi Kristu tyhydÿÿdu mahãdu rubutyhy-ò heka raõtyhy. Deuxu heka tii ritarenyke tii-wana rarehyyke. <sup>2</sup>Deuxu-ò Tyytybytyhy dori warurutymyra-di riwarurudÿÿnytyhyre. Rubu-ribi dori Jesuisi Kristu riwatare ixinamy ararekemy. <sup>3</sup>Inyboho heka Deuxu Bede Ywina rieryrenyre, Moisesi tyyritina wahe. Tii heka iny òraruna-ribi iny ixinamy ririradÿÿnymyhÿre. Jesuisi Kristule, aõbo, òraruna ruru rahumyhÿre. Aõma rakahurenyõtyhy heka iny rururenydi aõma òraruna ixitawo-di. Rikityhynyrenyõtyhy heka aõma ixitawo-di aõbo bede ywina Tahe Deuxu tariõre diteõnyde iny umyrenywesemy wahe. Tiu heka iòrarunaõhyyre. Tai heka rexiwahinyre iny òrarureny-ki. <sup>4</sup>Tai rikityhynyrenyke aõma Deuxu bede ywina. Iny nohõtireny rosake aõbo umy ehethinareny inydeereny rarybemyhÿré. Ijohonarenyõmy ta, irybe-ò, Deuxu Tyytybytyhy rybeõle rokoholamyhÿreny. <sup>5</sup>Aõbo Deuxudeewimy biwinybenykeki, tai Deuxu Tyytybytyhy rybeõle heka iny roholamyhÿke. Ixideewimy widÿÿmy burubenykeki tahe, aõwaxina bohobenyke umyehetxina rybe-ò. <sup>6</sup>Deuxu Tyytybytyhy rybe-ò ijohona heka iny umytÿmyra-ò ridymyhÿre, umytuedeõna-ò, ywina-ò. Umy ehethina rybe-ò iny rohola wana, tahe rubu-ò iny ridymyhÿre. <sup>7</sup>Umy ehethina dori aõma rare, Deuxu òludu. Deuxudeewimy aõkõ heka riwinymy ihÿre tiu riwinyõtyhy. <sup>8</sup>Inyõ ibutumy òraruna ixideewimy riwinykeki, tiu heka Deuxudeewina riwinyõtyhy. <sup>9-11</sup>Kaiboho tahe kiawesemy aõkõ heka toite. Deuxu Tyytybytyhy heka aworeny-ki rasÿnymyhÿre. Tai heka umytÿmyraõ heka kaiboho ijõdirenyre. Deuxu Tyytybytyhy heka kaiboho ijõdirenyke. Inyõ Deuxu Tyytybytyhy ihoõkeki, tiu tii ityhydÿÿdu aõkõ rare. Aumytyhy heka rurukre aòrarunaõ direki wahe. Atyytyby tahe iruhyymy ratxikre, Kristu dori aòraruna riixãwididÿÿnyreki wahe, Deuxu araõbitidÿÿnyre wahe.

<sup>12</sup>Tai waityhydÿÿdu seriõreboho. Umy ehethina rybe-ò uritere ijohonarenyõmy. <sup>13</sup>Irybe deradÿÿna-ò beõbybenykeki, kaiboho heka burubenyke. Aõkõkeki arurenymy mariabenykre, Deuxu Tyytybytyhy-di wahe. <sup>14</sup>Ibutumy Deuxu Tyytybytyhy rybe-ò roholamyhÿre mahãdu, tiiboho tahe Deuxu riõre roire. <sup>15</sup>Deuxu rybemy bityhynybenyke. Deuxu Riõre wesemy tahe bityhynybenyke, õbitimy atxibenyke, deõdu wesemy aõkõ wahe, buberubenyõtyhy. Waha-my tahe marybemyhÿbenykre heka. Deuxu Tyytybytyhydile wahe. <sup>16</sup>Ijoiirenymy rakatxirenykre. Aõmybo Deuxu Tyytybytyhy-di inydeereny roimyhÿreki heka, tuu inatyhymy rakatximyhÿrenykre inyboho iriõre roiremy wahe. <sup>17</sup>Ibutumy aõbo Jesuisi Kristu inydeereny riwahinymyhÿke heka, tule inyhõrõ reny heka rare. Iwese tii wowydyna iribi rikitarenykeki, tii-wana heka aõhõkÿmy rokotÿÿnyrenykre.

<sup>18</sup>Aõhõkÿmy rokotÿÿnyrenykre tahe aõnihikÿmy aõkõ rare, urihimyoõle wahe. Inydeereny dori wowydynaõ kidiwahinykre, sõwetyhymy. <sup>19</sup>Ibutu bede

bede aõna aõna riraõmy roimyhÿre, aõma-ò, Deuxu Riðre mahãdu ibutumy rubu-ribi ixixana kiditynnykreu, rexixamy ibutumy rÿirakre idi biu-ò rirahukre wahe. <sup>20</sup>Kiatxu tahe ibutumy bede bede raaõbinanyke. Iwese Deuxu juhuhu riwinyre-ribi resere iny òraruna òraru-ki. Deuxu dori tuu bede riywinyre txioinyhe tahe, raròsõna rÿire, riwitxiranyke. <sup>21</sup>Rekeysarenykre heka Deuxu riðremy heka rakatxirenykre. Tii ibutumy bede bede-ribi iny ritarenykre ibutumy òraruna-ribi, rubu-ribi. Ibutumy òraruna aõbina bina deòdu heka rexihukre. Deuxu ibutumy aõna aõna ritÿmyranykre iwese tariðre itÿmyrare wese. <sup>22</sup>Kaa wiji tahe ibutu aõna aõna aõhòkÿmy rotÿÿnny rÿira iròdu aldbòrdna, ibutumy heka uladu ijira dese wese heka rijemy aõna aõna rÿira. Aõma, ixixanatu dehemyntykõlemy roimyhÿreki wahe. <sup>23</sup>Tiibohole sohojile aõkõ, tule inyboho Deuxu Tyytybytyhyre hàre, kia delemy inydeereny rawahinyre hàre, aõhòkÿmy rotÿÿnnyhÿrenyre idi tiu Deuxu tariðremy risÿnyrenykemy riraõmyhÿre. Kia tahe inyboho riraõmyhÿrenyre. <sup>24</sup>Inyboho dori tararòsõna-ki kawese awirenyre. Inyò iraròsõna itÿnykeki, aõbo tahe riraõmyhÿke. <sup>25</sup>Tai tahe Deuxu rikityhnyrenyke rikiraðreny aõma, inydeereny tuu raryberé, rikitarenykré. Rikiyrymy rikiraõmy rokorokomyhÿrenykre.

<sup>26</sup>Iwesele tahe Deuxu Tyytybytyhy heka iny riwiðhenanyrenykre. Inyummy aõmydÿÿnanareny heka aõhebo rotÿÿnnyhÿre txuõ txuõlemy iny riwiðhenanyhÿrenykre. Inyboho riwiðhenanyrenykre aõma inyboho rierykõreki ixitðedÿÿ. Deuxu Tyytybytyhy inydeereny dori rexitðenymyhÿre tii inyboho heka aõmy rybe inyboho rierykõmyhÿrenyre inydee risÿnny rarybemyhÿre tuu. <sup>27</sup>Inybytyreny heka ibutumy inraykyreny, inyworeny, rierymyhÿre. Tii heka rexitðenymyhÿre inydeereny iny òbitinareny-di, iny ywinareny-di iny riixitðedÿÿnnyhÿrenyre. <sup>28</sup>Ibutumy aõbo inydeereny rabededÿÿnananyhÿrè heka inydeereny awire. Deuxudeewina heka rikiwinyrenyke inydireny ratximyhÿre Deuxu dori inyluurenyre. Tii dori iny ridyre tariðre wesemy. Tii dori kiamy juhuhu ròhõtinyre. <sup>29</sup>Juhudihikÿle Deuxu ròhõtinyre mobo tamy rakemy. Tahe tiu rierymyhÿre mobo aõma inyboho tamy kanakré. Tiu heka rierymyhÿre timybo widi rarekré, tariðre wesemy idi rarekré. Iriðre heka sòwemy iseriðre relekre. Iriðre tahe juhuule ityhydÿÿdumy iuhe rÿire, iseriðre wesemy wahe. <sup>30</sup>Tii heka inyboho rihitxinyrenyre. Tii heka ryrmyhÿre tamy, kanakemy. Tii inyboho tamy ritehemynyreu, heka inyboho tamy ritehemynyrenyre. Iny òraruna-ribi inyboho riixãwididÿÿnny Deuxu, Jesuisi, Deuxu Tyytybytyhy ywina heka inydeereny riwahinyre.

<sup>31</sup>Ywimy rakatxirenykemy heka inydeereny ròhõtinyry ihÿre. Wowydyna heka inydeereny riwahinykre. Timybo rakaryberenykre. Awire heka ibutumy. Nihikÿre. Deuxu heka inyworeny-ki ratximyhÿre. Tii heka inydinodurenyre. Inyòludurenyõhyre ratxirenyke, sohojiõ. <sup>32</sup>Ibutumy inydeereny riwahinykre —inydeereny dori taRiðretyhy dori diwahinyde. Diwahinyde heka inydeereny rurukremy. Deuxu heka iny riixãwididÿÿnyrenyre. <sup>33</sup>Inyboho heka òbitimy ratximyhÿrenyre tamy rakatxirenykemy. Tii dori iny riwinyrenyre òbitimy.

Inyõ rarybeõtyhy iny òbitimy aõkõ ihÿre. <sup>34</sup>Inyõ heka inymyreny rarybeõtyhy rukururenykremy. Jesuisi Kristu dori inydeereny rurure, iny òrarureny-ki. Tii ixityre rubu-ribi rexixare inydeereny. Katahe rononymhÿre Jesuisi heka rexitðenymy rononymhÿre inykireny. Deuxu-ò heka iny riixitðedÿÿnyremy inydireny rononymhÿre. <sup>35</sup>Tiu heka rihitxinyõtyhy, aõma Jesuisi Kristu luureki wahe. Aõhõkÿmydÿÿnana dori rakatxireny. Tii heka iny rirubunyrenyke. Iny rama rirubunyrenyke inieruõmy. Bede brebuwo-ki rakatxirenyke. Inymyreny rarybemyhÿkre. iny rirubunyrenyke. Ta Deuxu inywanarenyhyy ratximy ihÿre. Tiu heka Deuxu-ribi aõ iny rihitxinyrenyõtyhy. <sup>36</sup>Inyboho heka rubu riraðhyky ratximyhÿreny, rexiwinyhykyle. Kia rikiwinyrenyke aõma Deuxu luuna-di xiery —iwese budoeni tarubuna riraõmy rÿimyhÿre wese. Deuxu rybe inykoreny tuu relyymyhÿre. <sup>37</sup>Taiki heka imahãduy-ribi rokotarenkyke. Kia òlõna inyhõrõreny rare. Kristu dori inydeereny rurure. Aõ heka iny rihitxinyrenyõtyhy Deuxuluuna-ribi. Rubu dori iny rihitxinyrenyõtyhy. Umy tiu iny-ribi rihitxinyõtyhy. Ýju dori tiu iny rihitxinyõtyhy. Aõbinahakÿ heõty, rubu bina heõty dori tiu Deuxu luuna-ribi rihitxinyõtyhy. <sup>38</sup>Aõ heka iny rihitxinyõtyhy Deuxuluu-ribi. Biu wenonana dori, beheÿ ratyre, tiu Deuxu luuna-ribi iny rihitxinyõtyhy. Wiji aõna aõna itõmo rahudi aõna aõna, aõtxi aõna aõna tiu iluuna-ribi rihitxinyõtyhy. <sup>39</sup>Kia ibutumy wadee inatyhy rare. Jesuisi heka Deuxu inydeereny ritÿmynymyhÿre ibutumy iluuna iny òrarureny-ki rurureu.

**9** <sup>1</sup>Kaiboho wajjoiireny, waityhydÿÿdu seriðre mahãdu. Kristu hõrõ jiarÿ rare, inytyhy rare. Deuxu Tyytybytyhy, Jesuisi Kristu-wanale rierymyhÿre kia inatyhy rare. <sup>2</sup>Rabedewomy heka watxireri wajjoi rityhynyõreki. Deuxu Tyytybytyhy kia rieryre. Txuõ txuõlemy, ruõ ruõlemy rabedewomy watxihãre. Txiole txiole aõmydÿÿnana amy adeereny ararybeke kaiboho tarasanaõ boibekemy. <sup>3</sup>Deuxu riwatuhoke Kristu-ribi wajjoi derõwomy, iwihedhÿÿkeki. Jiarÿ heka ihyy arurukemy wajjoi ityhydÿÿdukõdu mahãdu wahe ixidi tamyreny rahõtinyinmy watxireri. Kia biu-ò hena ritarenkykemy wahe. Tahe aõkõre heka. <sup>4</sup>Deuxu heka tamyreny sõwemy diwahinyde. Ihãrele tiiboho ijohona deramy rekoamahãreny. Aõma, rihitxinyreny heka tajjoiirenymy. Ridyreny heka bederahy-ò loosõna-ki biuwetykywo-ki. Tahe tamyreny rarybere tii iluurenymy. Tamyreny heka sõwemy aõ kidiwahinykemy idireny ratximyhÿre. Tule tabede ywina rybe tamy diwahinyde. Tai tahe Deuxudeewina reeryreny. <sup>5</sup>Tamy heka Deuxu wowydynaõ riwahinyrenkykemy Deuxu teõduõ kanake tii tamy rarybere. Tybyreny dori ilahiboho dori rityhynyreny, tii Deuxu sõwemy rityhynyreny. Kristu tahe tule judeu mahãduõ ratximyhÿre, wajjoi wahe. <sup>6</sup>Deuxu rybe inatyhytyhy rare. Sõwemy iny judeu mahãdu wese roire. Ibutumy tahe judeu mahãduutyhy aõkõ roire. <sup>7</sup>Ibutumy judeu Abraõ riðre riðre rÿÿra mahãdu aõkõ heka Deuxu riðremy rarekre. Deuxu heka Abraõ-ò rarybere: —Ijai riðrele ariðkõre rarekremy ijõ aõkõ. Ibutumy Abraõ riðre, Ijai riðre aõma ityhydÿÿdu aõkõ roire. <sup>8</sup>Ijõ iriðrekõna mahãdu tahe ityhydÿÿdu heka roire. Kia Deuxu rybe rityhynymyhÿrele heka ityhydÿÿdu mahãdumy rÿÿra —judeu mahãdu

tyhy wahe. <sup>9</sup>Juhuu tahe Abraõ-ò Deuxu rarybere: —Ahāwyy Sara, iriòredikre ijõ beõrau wahe. <sup>10-11</sup>Iu tahe Ijai iriõre hāwyy-wana herinanyreu, Rebeka-wana roire tahe inatxi uladumy heka Rebeka tamy kidiwahinykremy riywinyra. Ijau juhutyhy iriòredelamy reake riywinyra. Ijõ tahe Ijaò ini rarekre. Kawese Deuxu rarybere uladu reakõule: —Jiarỹ heka Ijaõmy retamy rarybere Ijau aõkõ. Jiarỹ aõna aõna sõwemy tamy adiwahinykre. Deuxu kiamy rarybere Ijau reakõule. Tiu aõwiwihikỹ aõbina bina riwinyke aõkõ. Myle roireri. Deuxu riteòsinyre ijõ tarasanamy reake-ribi tahe ijõle tuu reare. Aõ uladu tuu riwinyreriki aõkõ Deuxudeewimy tuu riwinyre. <sup>12</sup>Juhuutyhy Rebeka-ò rarybere: —Idela taseriõre deòdumy rarekre. <sup>13</sup>Iwese tyyriti-ki roire wese: —Ijaò iluure tahe Ijau aõkõre.

<sup>14</sup>Aõmybo tahõtinyteri? Deuxu aõbo adee ibinare kia riwinyreki? Aõkõre heka. <sup>15</sup>Deuxu rarybere Moisesi-ò: —Jiarỹ heka awimy inyõdee ariwinykre, tahe tuu ariwinykre. Inyõdee ruxetõena ariwahinykeki, tamy ariwahinykre iixideewimy. <sup>16</sup>Deuxu ruxetõenale heka rare, iny aõmysỹdỹ sõwehekỹmyreki aõkõ inydee tarasana riwahinykre. <sup>17</sup>Kaheka iny rieryre Faraò (Egito bede iòlò) ijyy dori inydee kia riteòsinyre iwese Deuxu rare wese wahe reteherenyké. Deuxu kiamy rarybere Faraò dee: —Adee kỹny ariwahinyre ruuõ kai bonyke iòlõmy. Tai tahe ibutumy iny wani wiwihikỹ-ò roholakre. <sup>18</sup>Ibutumy Deuxu ixideewimy tuu riwinyry rỹirakre. Ruxetõena riwahinyke tamywi tahe riwahinyra.

<sup>19</sup>Inyõ tahe wadee timy rarybeõtyhy: —Aõherekibo kawesemy Deuxu inyõ aõhe risỹnykre ada amobohe Deuxu aõwidỹyna deramy reake. <sup>20-21</sup>Tiu moõ rarybeõtyhy Deuxumy ibinamy. Iu inyõ butxi riwinykreu, aõma sudeõ rimykreu,



(Roma-ò 9.20-21)

riwinykre heka butxiwihikỹõ tamywikeki. Ibinaõ riwinykeki tasỹ iwesele riwinyke ibinamy tuutyhymy. Bedenamy riwinyke noijaka tamy ridemyhỹkemy. Ijõ butxi tamy wikeki. <sup>22</sup>Iwesele heka Deuxu rare. Rebureke heka inyõdee raykarananyke. Ijõ-ò tahe awike ta ruxetõena-di riwiõhenanyke iaõna aõna rijjemy. <sup>23</sup>Idi tahe rõkõhõtinyreny timybo Deuxu wina, Deuxu loosõna awiremy iruxetõena inydeereny riwahinyhyymhỹre. <sup>24</sup>Judeukõdu mahādu Deuxu ritare. Judeu mahādu yribi sohoji aõkõ. Inyboho. <sup>25</sup>Osea tyyriti-ki rybeõ kiamy tai roire Deuxu rarybere wahe: —Ijõ mahādumy sỹ aronykre wariõremy. Tahe wajioiy-ribi aõkõ wajioiõ mahādu aõkõ wajioimy arininikre idi aritakre. Tuumy ararekre. Tiu heka luuna juhuu

inyõ rewahinyõhyre. <sup>26</sup>Deuxu rarybere tiu: —Kaiboho juhuu wajoi aõkõ toite, tuuõmyta kowa-ki wariòrenenymy boibekre. <sup>27</sup>Isaia tule rarybemyhÿre aõma judeu mahådumy wahe. Sõwemy, sõwemy imahãduõ hãre tahe, ibutumy tarasanamy reakre. <sup>28</sup>Deuxu ele elemy rotÿÿnykre timybo rarybere myna. Ijõ-ò ruxetõena riwahinykre ijõ-ò adehuna riwahinykre riixãwidinyrenykremy. <sup>29</sup>Ijõ Ritidÿÿna-ki Isaia rarybere: —Deuxu ibutu dinodu heka ruxetõena riwahinyõkeki, ibutumy judeu mahãdu riixãwididÿÿnykre iwese Sodoma hãwã Komora hãwã-wana riixãwidinyre wesemy wahe.

<sup>30-31</sup>Timybo rakaryberenykre kia aõmydÿÿnanamy? Kialemy: —Judeukõdu mahãdu-ò Deuxu tarasana riwahinyre tiu Deuxu riijeõhyymyhyre hãrele. Judeu mahãdu heka rityhynykemy idi ratximyhyre ibede ywidÿÿna-di tahe tiu heka ritaõhyymyhyrenyre tarasana. <sup>32</sup>Bede ywina rybe riyrubunyekhãre awikehãre tiu tarasana ritaõtyhy. Rityhynytyhykekile heka tuuke. Tai tahe ritaõre tarasana, rityhynytyhyõrenyre. Tai tahe iwere mana iny riatymyhyre were rydÿÿnarenyre. <sup>33</sup>Ijõti nihikÿ heka roimyhÿre. Tiu heka riõhõreõtyhy iweribi-ò. Deuxu rybe-ki kia wesemy roire: —Judeu mahådury-ki mana nihikÿ wese retidimy doimyhÿde. Sõwemy heka iny rÿira tiu heka ityre-di rariaõtyhy biu-ò hena-ò dehemynydeki wahe. Kia iny rityhynymy Jesuisi Kristu rÿirale tahe ritakre tarasanaõ heka inatyhy.

**10** <sup>1</sup>Waityhydÿÿdu seriõre, rexitõenymy wãhãre heka Deuxu-ò ibutumy judeu mahãdu biu-ò henamy rÿikemy. Kiamy tuu rarumahãre. <sup>2</sup>Reerymahãre tiiboho ibutumy rityhynymahãrenyremy Deuxu. Tiiboho ityhydÿÿnareny tahe õbitihyky aõkõre. <sup>3</sup>Tiiboho kiamy röhõtynmahãrenyre aõma judeu mahãdu heka bede ywina rybe rityhynyrenykekile rexiõbitinykemy heka röhõtynmahãrenyre Kristu-ò ta rexiwelõrõkõlemy Kristu bede-ò rexihumyhyre, tai Deuxu iny-di awimy rarekemy. <sup>4</sup>Bede ywina heka Deuxu aõmydÿÿna tarasana aõkõ heka rare. Kristu rityhynymahãrenyke. Kia weseleke heka tii rimyreny rexiõbitinyre. <sup>5</sup>Moisesi dori rõritidÿÿre tuu: —Inyõ tiu õraruna-txi reseõhy rarekeki, taile iny tarasanamy ratxike. <sup>6</sup>Kiamy heka ityhydÿÿna namyhÿde. Uritere inyõ Kristu biu-ribi kõdidykemy ixinohõtidiÿÿõna Kristu kidiwykredi uritere nohõtirenõmy, isiratyhyre wahe. Tuu aõkõ iny õbitidÿÿna-ki rahamyhÿre. <sup>7</sup>Uritere Kristu ixixana-di mohõtynnyõmyke isiratyhyre dori kia-ribi õbitidÿÿna kiditakremy. <sup>8</sup>Tii heka inyboho ribedeerynanymyhÿre. Iõhõlemy heka iny-ribi ihÿre warybereny wahe. <sup>9</sup>Iny taykyrenyke rityhynymyhyre inykile. Tai tahe rarybere inywitxira-ò aõma Kristu iny wedureny ihÿremy wahe. Inyworeny-ribi rikityhynymyhyrenykeki. Aõma Kristu heka Deuxu riixixanyre rubu-ribi. <sup>10</sup>Taiki tahe biu-ò hena rakatarenykre. Aworibityhy rikityhynymahãke. Kiamy heka iny õbitimy rekelerenyke Deuxu dee wahe. Rarybeke iny-ò rityhynymy ratximyhÿremy tai tahe tuu relemy ratxike. <sup>11</sup>Kiamy heka Ritina-ki roimyhÿre: —Inyõ rityhynytyhyhyke heka teysamy ratxike. Tiu heka anabedewoõtyhy tatyhyna-ki. <sup>12</sup>Judeu mahãdu dori judeukõdu mahãdu-wana wiwesele rare. Ibutumy heka sohojihyyle iwedure, Inynyrÿ wahe. Ibutu heka inydee

riwahinymyhÿre aõmybo iny rexitòenymyhÿre wahe. <sup>13</sup>Iny rexitòeny-wana Inynyrÿni-di tarasanamy, tai iny-ò riwahinymyhÿre. <sup>14</sup>Teerykòte heka timybo idi ratximyhÿre rexitòenymy. Timybo bieryke inyõ tuu relyykòhãre heka rityhnyke. Tamy heka roholaõtyhy inyõ tuu relyyòkeki tiu ityhydÿyõna. <sup>15</sup>Inyõ heka raõtyhy, inyõ biteõnyòkeki wahe. Kiamy tahe Tyyriti rarybereri: —Kia Rybewihikÿmy rybedu heka awi heka rare, dehemynyna heka awire, deysana rybe dori diwymyhÿde. Deuxu rybena ywina wihikÿ heka diwymyhÿde. Tai tahe iny reysamy heka aõma Deuxu Rybewihikÿ tamy riwymyhÿreki wahe.

<sup>16</sup>Ibutumy aõkò tahe rityhynymyhÿre. Iwese Isaia Deuxu rybedu rarybere wese: —Inynyrÿ, Rybewihikÿmy tamyreny heka rarybemyhÿreny. Ihãrele tahe rityhynyõhymyhÿreny. <sup>17</sup>Ityhyna heka Rybewihikÿ-ò iny roholamyhÿreu, rityhydÿÿmyhÿre. Kristu ityhyna tamy kedehemynykre, rybe wihikÿ òraru-ki wahe. <sup>18</sup>Dÿÿraxinaõ ariwinykre. Taholatenyõte aõbo Deuxu rybe-ò? Kohe, ibutumy heka roholamyhÿre. Tyyritina-ki roire: —Deuxu rybe tÿmyra wihikÿ ibutumy riteõnymyhÿre hãwã hãwãmy. <sup>19</sup>Ijõ arÿÿraxikre: —Judeu mahãdu aõbo kia rierÿõmyhÿre? Moisesi tyriti-ki roire: —Deuxu biu-ò hena judeukò mahãdu-ò ariwahinykre. Wajoi mahãdu ariwoxibronykemy. <sup>20</sup>Isaia tahe idi tuu rarybere: —Iny wiwana mahãduõ heka Deuxu rijemyhÿre. Tii rexitÿnyny re taðrÿsydu mahãdu-ò. Itxi reare. <sup>21</sup>Isaia rarybere Judeu mahãdumy kia: —Ihãrele Deuxu iny ritobinyrerimy ihÿre iny, iny nohõtibinaki wahe.

**11** <sup>1</sup>Kaiboho heka timybo tahõtïnymahãtenyete Deuxumy? Tii aõbo tajoi-ribi nohõti rosaremy —judeu mahãdu-ribi? Aõkõre. Jiarÿle, Paulo, judeu mahãduõ rare. Jiarÿ heka Abraõ riokoreõ rare. Benjami ijoio heka jiarÿ rare. <sup>2</sup>Deuxu tajoi-ribe nohõti rosaõtyhy. Tii juhuu ritare. Elia juhuu Deuxu-ò tajoiimy rarybere. Ryberiti-ki kia roire: <sup>3</sup>Tiiboho heka rybedu mahãdu rirubunyre. Tule axiwenã wahidÿÿna ribòhònnyre. Jiarÿ sohojile aluure Deuxu. Tule ròrubudÿÿmy wadi ratxirenyreri. <sup>4</sup>Timybo Deuxu heka Elia-ò dirawyònnyde: —Aõkõre, kai ihewoludutyhy waluunadu aõkò tate. Waluunadu 7000 inymy rÿire aribihiximy wahe. Tule Bali suritxoo tiu rityhynyrenyõhymyhÿre. <sup>5</sup>Katahe wijile iwesele rare. Iny ibutemy Deuxu hõrõ mahãdu rÿire. Tii taruxetòenadile ritarennyre. <sup>6</sup>Deuxu ruxetòena heka aõ iõwy-di aõkò riòwynymyhÿre Deuxu riwahinymyhÿre. Aõwihikÿ diwinymyhÿdenydeki aõkò heka tuu heka ratximyhÿrennyre iõwydikeki tahe aõ ruxetòe aõkò rare. <sup>7</sup>Deuxu heka judeu mahãduõ rihixinyre tarasanamy rekré. Ijõ tahe iwety mahãdu wesemy ijõ rÿira. Deuxu tamy tarasana-ò ryrereri tiiboho roholaõre. <sup>8</sup>Tyyritina-ki rarybemyhÿre rõrõmy ratximyhÿrennyre. Deuxu heka riruberennyre ihãre ta tõhõtirennyre ratòbõnyrennyre. Taita rierÿõhyrennyre heka Deuxu Tyytybytyhymy rarybemyhÿrennyreki wahe. Iwesele heka wijina roimyhÿre. <sup>9</sup>Ihetxiu Iòlò Davi iwesele rarybere: —Kia heka taworana bedehesina-ki, ramyrennykre, raborenykre, tabonahemy reserenykre idi aõhòkÿmy rotÿÿnykre. <sup>10</sup>Irue idymy releke tiu robiòkemy. Tiemy rarabunnykre iaõbinabina-ki.



<sup>11</sup> Adeereny arỹȳraxikre kiamy: judeu mahādu resereu ixāwire aōbo? Aōkōre. Urile tarasana nade judeukōdu mahādu-ò tai. Judeu mahādu ibinamy tai rōhōtīnykemy. <sup>12</sup> Judeu mahādu òraruna òraru-ki heka sōwemy iny-ò aōwīwīhikỹ nade, judeukōdu mahādu-ò wahe. Tahe awityhymy rarekre ibutumy judeu mahādu ralokremy. <sup>13</sup> Jiarỹ, Paulo wahe, rybe wahidỹȳdu heka jiarỹ rare. Judeukōdu mahādu-ò tii heka jiarỹ rare. Uritere nohōti losarenyōmy kia waaōmysȳdỹȳna rare. Kia awi heka wadee rare. <sup>14</sup> Deuxu heka adeereny aō nihikỹ adeereny riwinyre, kaiboho judeukōdu mahādu rare. Judeu mahādu robikre. Tai heka tiiboho biu-ò hena mahādu-wana ratxikemy riwisȳnykre. Kia wese òsana ijō tarasanamy rimykemy. <sup>15</sup> Judeu mahādu wiji rityhinyōrerri. Tai Deuxu ijō mahādu-ò biu-ò hena riwahinyre, judeukōdu mahādu-ò wahe. Iny sōwemy tai ritamy rỹimyhỹre òraruna-ribi. Iwese inyō rubu-ribi riixixanyre wese kia rare iu judeu mahādu ralōkre wahe. <sup>16</sup> Juhuu paō ere awimy Deuxu-ò biwahinykeki, ibutumy paō ihōrō rare. Òwòru rutysōmo Deuxu-ò biwahinykeki, ibutumy òwòru ihōrō rare. <sup>17</sup> Òwòru ere judeu mahādu wese rare. Tiiboho òwòru-ribi raòròm̄y raremyhỹ. Kaiboho judeukōdu mahādu teròwmy atximahātenyte. Kia òwòruru wesemy òwòru-ò ralòm̄y atximahātenyte, tai tahe arumy atximahātenyte. <sup>18</sup> Ixityhymy nohōtīrenyōmy. Kaiboho dori iratyre awimy aōkō atximahātenyte. Òwòru rutysōmo aramyre judeu mahādu tyby wese wahe. Aōkōkeki, kai bedesekre òwòru desede wese. <sup>19</sup> Kaiboho òsana marybebenykre: Tiiboho òwòru-ribi ritamy raremyhỹ inyboho rikibynyrenykemy. <sup>20</sup> Inatyhy rare. Urile òhōti-ribi losarenyōmy tiiboho iribi ritamy raremyhỹ rityhinyōrenyeki. Tule kaiboho talòm̄y tatemyhỹ tetyhynymyhỹtenyeki. Tai ixiwededȳōrenyre urile bexityhynymy. <sup>21</sup> Judeu mahādu heka òwòru rutyhy wese raremyhỹ. Ihārele tahe Deuxu òwòru-ribi ritare. Timybo tahōtīnytenyteri —Deuxu aratarenyōtyhy. Tule aratarenyke timykeki. <sup>22</sup> Deuxu dori ywimy rare ijō-ò. Tule tii isirare ijō-ò: —òraruna-txi besebenykeki, tii aratarenyke. <sup>23</sup> Judeu mahādu ixbyby rityhinyrenykeki, ixbyby Deuxu ritidikre iherina-ò. Deuxu irurudirare ixbyby ritidikremy —isiraōre Deuxu-ò. <sup>24</sup> Kaiboho heka òwòru bederahy ludu wesemy atxitenyte. Iwese òwòru ludu-ò tii aratidirenyre wese. Judeu mahādu dori òwòru ludu wesele rare.

<sup>25</sup> Waityhydỹȳdu seriòre, inatyhynaōmy adeereny arelyykre. Deuxu rieryre tiwesemybo judeukōdu mahādu rityhinykre. Ikonana kaiboho bityhinybenykrey, judeu mahādu ixbybyle kanalokre. <sup>26</sup> Tai tahe ibutumy judeu mahādu ritakremy. Tyyritina-ki heka kiaweselemy roire: —Siaō-ribi tarasaduō kanakre. Ibutumy heka judeu mahādu òraruna-ribi kòdòðsekre. <sup>27</sup> Kia bedeu heka aritakre iòrarureny wahe iwese tuu rarybere wese juhuuhukỹle. <sup>28</sup> Katahe rasōwemy roira aōma judeu mahādu wahe. Tiiboho Rybewihikỹ òludu roire. Tamyreny heka awi aōkō Rybewihikỹ. Kia heka adeereny awimy rōhōnyre. Tetatenyta dori Deuxu-ribi aōma iwahidỹȳna aōna aōnawidỹȳnamy. Deuxu juhuu taluunamy walabiereny-ò rarybere. <sup>29</sup> Deuxu heka tiu riwitxiranyōhyymyhỹre. Releke wana heka riwinymyhỹre tahōrō mahādu dee. <sup>30</sup> Judeu mahādu heka Deuxu rityhinyōmy

roimyhÿre wahe. Tai heka Deuxu ruxetòena adeereny diwahinyde. <sup>31</sup>Katahe judeu mahādu heka wiji roire ityhydÿÿmy aōkō. Aōtxu tahe Deuxu ruxetòena ixbyle rimykremy rÿira. Deuxu heka iximymy iny riteònyrerimy ihÿre. <sup>32</sup>Deuxu ibutumy òraruro-ò rityhere idi taruxetòena ritÿnynykemy.

<sup>33</sup>Iny Deuxureny aōwi dinodu heka rare. Ibedeerytyhytyhy rare. Inyō ibedeywidÿÿna rieryōhyymyhÿre. <sup>34</sup>Tiu rikieryrenyōtyhy irayky, tiu rikibedeeryrenyōtyhy. <sup>35</sup>Inyō tiu Deuxu tadiwidÿÿdumy isÿnyōna. <sup>36</sup>Ibutumy dori Deuxu-ribi hikÿle nade ixidee. Ibutumy iruru namyhÿde. Tai tahe ibutumy wowydyna tamy rikiwahinyrenykemy inyboho ratximyhÿreny.


**12** <sup>1</sup>Thahe waityhydÿÿdu seriòreboho, aumyreny heka biwahinybenyke Deuxu-ò. Aramyrenykemy òbitihÿylemy. Kia wowydynatyhy Deuxu-ò. Tii dori ibutumy aōma inydeereny riwinyre. Kia ibutele rarekre tamy. Tii dori sōwemy riwinyre inydeereny. <sup>2</sup>Uritere riraōmy bede ludu mahādu wesemy. Iwitxiramy boibeke. Tai Deuxu dee awimy kia rarekre. Aumy tÿmyramy ibutumy biwinymahāke. Tai tahe Deuxu ribedeerynanykre aōbo awire.

<sup>3</sup>Jiarÿ heka Deuxumy rybeduōmy rare adeereny. Tai adeereny ararybekre bexijebenyke. Òbitimy marybemy aumy-ribi. Deuxu-ribi ityhyna adeereny diwahinydekí heka aōhe botÿÿnykemy mohōtinymahābenyke. <sup>4</sup>Umy heka sōwemy txura txura roire, umy hitxi hitxinamy rÿire. Kristu ityhydÿÿdu mahādu kia wese rare, Kristu woludu mahādu wahe. <sup>5</sup>Tule Kristu mahādu sōwemy aōmysÿdÿÿna witxira rÿire. Sōwemy iny wiribi hitxi rÿire. Iwese umy sohoji wese Kristu wo mahādu rÿire. Ibutumy wiribi hitximy raaōmysÿdÿÿmy iwidÿÿmy rÿimyhÿke. Inyboho heka ibutumy iaōmysÿdÿÿna Deuxu-ò rikiwinymyhÿrenyke. <sup>6</sup>Deuxu heka aōwidÿÿna widÿÿna witxira iny sohoji sohoji-ò riwahinyrahÿre. Kai heka tÿnydÿÿna abrysikeki, awimy bexityhnyke awimy biwinykemy. <sup>7</sup>Awimy wiòhedÿÿmy atximahāte wana, bōwiòhenanyke awimy. Rybedÿÿdumy atxiteri-wana awimy òbitimy bibedeerydÿÿmy. <sup>8</sup>Deuxu rybemy rybedu atxiteri-wana marybeke inydee bexityhnyky. Deuxu sōwemy adee nieru riwahinyre-wana, bōwiòhenanyke inywitxira. Inydinodumy atxiteri-wana, òbitimy maaōmysÿdÿÿ ibutu dee. Kia dohodÿÿdukeki botohodÿÿkre inyō aō biwahinykeki awowi-di bowahike.

<sup>9</sup>Wiribi ihitxidÿÿōmy. Tuu luu-di tahe inywitxira hitximy. Uritere rybeōmy urirybele. Uritere rybe òbitikōmy rÿireò noōmy. <sup>10</sup>Kaiboho ityhydÿÿdu seriòre atximahātenyete. Tai wiluumy atxibenyke. Widee biwowydynybenyke, ixidee aōkō. <sup>11</sup>Aōmysÿdÿÿna-di boibenyke. Ibutumy Inynyrÿ-ò biwinybenyke eysareny-di. <sup>12</sup>Beysamy atxibenyke ywina-di aōkōkÿmy dÿÿnana-ki. Bexitòenyhyymahābenyke. <sup>13</sup>Aityhydÿÿdu seriòrey-ki inyō aō ihoōkeki, tamy biwahinyke ahōrō-ribi. Inyō ihetoōkeki, bidybenyke aheto-ò. <sup>14</sup>Inyō ibinamy adeereny riwinykeki, tahe ibinamy aōkō biōwynyke. Bexitòenyke Deuxu-ò tamy. <sup>15</sup>Inyō reysakeki, tii-wana beysake. Inyō rahinykeki, robukeki, tii-wana mahinyke, bobuke. <sup>16</sup>Ywimy ibutumy iny-wana boibebenyke. Ixityhy aōkō nohōtiōmy. Kai dori ibutumy aōkō teeryte, tule aaōmysÿdÿÿ bina awimy bimynybenyke.

17Inyõ adeereny ibinamy riwinykeki, ibina-di aõkõ biõwynybenyke aõma uritere ywihyylemy boike. 18Wiwesehyyle ywimy rĩimyhĩre. 19Inyõ umy aõma rarybekeki, uritere ixiõwydĩĩmy nohõtiõmy. Deuxu-wana birimy. Tii heka riõwynykre iaõhõkĩmydĩĩnana-di. Kia tahe roire Tyiritina-ki. 20Aõma aõludu ramamy ruru wana, tamy rĩsĩna biwahiny, bemy tii ruru wana, tamy bee biwahiny. Tai tahe tii raixĩrure aõbo adee riwinyre lau. 21Aõbinahakĩ rĩĩra-wana, uritere iĩjradĩĩõmy. Ibutumy aõwiwihikĩle aõ biwinymyhĩke. Tai tahe rexihuke aõbina bina.

**13** 1Bityhinyke bede dinodu. Deuxu dori risĩnyre bede dinodumy. Ibutumy dinodu heka Deuxule inydeereny riwahinyre. 2Inyõ bededinodu rityhynyõkeki, tii heka Deuxu rityhynyõmyhĩre. Iny õbitimy ratxikeki, tiu bede dinodu rimyõtyhy rõtena-ki aõhõkĩmy dĩĩnana rotĩĩnyõtyhy. 3Inyõ õbitimy ratxikeki heka tiu bede dinodu lau ruberuõtyhy aõhe risĩnyõtyhy. Urile iny aõõtaõtalemy rotĩĩnyreure tahe, tiile ruberumyhĩre bede dinodu lau. 4Bityhinybenyke ibutumy bede ywina aõbo dinodu mahãdu raryberé. Brebuõlemy botĩĩnybenyke. Deuxu diteõnyde heka bede dinodu iny riwiõhenanykemy. Kai aõhõkĩmy botĩĩnymyhĩke aõõtaõtamy tatĩĩnymahãte-wana. Bede dinodu dori tuu nade. 5Ibutumy bede dinodu bityhinyke. Tii heka biwinybenyke Deuxu dee kia awire. Tai heka aõhõkĩmy botĩĩnybenyõtyhy. 6Tule iõwy biõwynmahãbenyke. Ibutumy heka biõwynmahãbenyke aõma tuu dinodu rarybemahãre wesemy. Tai dori riõwynymyhĩre iaõmysĩdĩĩdu. Tii heka anawiõhenanymyhĩde. 7Biõwynmahãbenyke aõbo õbitire, ibutumy wahe. Aõma dinodu iõwydĩĩmy rariõwymahãre-wana biõwynyke ibutumy awedu mahãdu wahe. Bityhinyke ibutumy.



(Roma-õ 12.11)

<sup>8</sup>Inydee tanadevenymahâte-wana, biòwynyke òbitihyulemy. Inywitzira luumy atximahâke ibutumy iny wahe. Tii dori Deuxu bedeywina-ki bede òtiidÿña xiery ratximyhÿre. <sup>9</sup>Ibutumy Deuxudeewire heka kaa rare. Aeryna luumy iwese ixiluure wese, tahe tamy ibinaõre. Kai rubudÿÿõmy aõbo, ada wasimy iribi texiwonyte ada ihãwyy-wana maõtakemy aõbo, texinohõtidiÿnyte. Uritere aõbina-di ixinohõtidiÿõmy aeryna-ò. Uritere aõbina widÿÿõmy. Aerynaluumy mabeke iwese kai ixiluure wese wahe. <sup>10</sup>Luuna inyõ-di rarekeki ibina inyõdee riwinyõtyhy rare. Ibutumy Deuxudeewina heka riwinymyhÿre. Tii sohojile heka bede ywina-ki awityhyre.

<sup>11</sup>Tule heka òbitimy matximahâke. Bededÿñnana dori iòhõmy resera. Bede ityre reakremy namyhÿde. Bexixabenyeke wa, Inynyrÿ heka iòhõmy ratximyhÿre inonana-ò. Iòhõtyhymy relera juhu rityhynyrenyrye-ribi. <sup>12</sup>Ruu heka rõhõnymy rare. Txuu tule iòhõmy wahe. Uritere aõbinahakÿ bedeluruhukÿ aõmydÿñnana widÿÿõmy. Diabo ijesu bitake aõwihikÿ widÿÿ wahe. <sup>13</sup>Òbitimy biwinymahâke iwese txu rojuxana iny ratximyhÿre wese. Tai ibutumy iny rarybemahâke kai iluumy atximahâtemy. Uritere abededÿñnana huduõmy — itxÿteõmy, òtaõmy, adeburemy ijiraõmy, ihãruõmy. <sup>14</sup>Bexitõenymyhÿke Inynyrÿ Jesuisi Kristu-ò wahe anawiòhenanykemy. Tai tahe ibutumy òbitimy biwinymahâke. Uritere arayky aõmydÿñnabinabina nohõtioomy.

**14** <sup>1</sup>Ijoiò ityhydÿÿdu mahãduò amahãdudÿÿmy rurukeki, rõtena ixinamy ralòke iityhyna ibuterehãre tii-wana aõna aõnamy widee rybetyhymy rybeõmyke. Aribi hitximy raraykynyke hãre, bidyke. Ihãrele birõtenybenyke. <sup>2</sup>Ityhyna irurukõmy ratximyhÿre hãre birõtenybenyke. Tii òsana kiamy raraykynymyhÿre: Iny rexiòwynyke iròdude riròmyhÿrenyremy ijõ rõhõtinyke. Kai tahe òsana mohõtinyke kiamy. Tuu ibinaõre. Ityhynareny urihimyoõle rare. Brebunale sÿny roholamyhÿre. <sup>3</sup>Inyõ tahe ibutumy riròmyhÿre. Awimy idi tahõtinyamahâte-wana, wiribi hitximy aõkõ. Uritere iòhõresedÿÿrenyõmy. Deuxu dori ridymyhÿre iwesemy iweselemy. <sup>4</sup>Deuxu deòdumy tii rare. Eòdumy aõkõ. Deuxu-ò tii rirawyoõnyre aõhebo rotÿÿnymyhÿremy. Deuxu rarybeke aõbo òbitire, aõbo teòsare. Deuxu heka tii ritamadÿÿnymyhÿre. <sup>5</sup>Kiamy rakaraykywesenananyrenykre. Txuõ aõworana bedehesi heka judeu mahãdu riwinyemy roimyhÿre. Kia txuule Deuxu-ò reãlananymyhÿre rexinohõtidiÿnymyhÿre. Tahe aõkõre. Ijõ ityhydÿÿdu mahãdu tahe aõkõre. Tii iwitzira rexinohõtinymyhÿre. Ibutu txuu tamy awire Deuxu àlana riwahinymyhÿre. Ixideewimy iny sohoji sohoji raraykywydynanymyhÿre. Ixitawimy Deuxu riwowydnyre. Ibutumy iny òbitimy ixidee raraykynyke. <sup>6</sup>Kaiboho atxu biywinymyhÿbenykeki, kia tahe awire. Xiwenade riròkeki, tii tule Deuxudeewire riwinyre. Inyõ aõkõ riwinyre. Tii tule awimy riwinymyhÿre Deuxudeewina wahe. <sup>7</sup>Ixideewimy rikiwinyrenyõtyhy inynyrÿ-ò dori inyboho roire. <sup>8</sup>Inynyrÿdeewimy rikiwinyrenyke. Ihõrõ rare, aruruhãrele, aõkõhãrele. <sup>9</sup>Jesuisi Kristu rubu-ribi rexixare tai butu wedumy. <sup>10</sup>Inyboho heka ihõrõ mahãdu roire. Tai uritere inyseriõre rybeõmy ixiradÿÿõmy.

Inyboho dori sohoji sohoji Deuxuru-ò rexideòsinyrenykre. Iu tii ibutumy iny riywisinykre. <sup>11</sup>Kiamy heka Ritidÿÿna-ki roimyhÿre. Inynyrÿ heka rarybere: —Inatyhymy, Ibutumy warue-ò tatiowotimy resekre. Rarybekre heka wamy Jiarÿ Deuxu raremy. <sup>12</sup>Iny sohoji sohoji iximy relyykre Deuxuko-ò.

<sup>13</sup>Uritere inywitxira-ò ryberenyõmy tii ibinamy rare uritere aõwidÿÿõmy, iòraru-ki ixhydyÿÿdu òraruna-txi resehemy. <sup>14</sup>Jiarÿ tahe kiamy rahõtinyre. Kia aõmydÿÿnana aõ aõkõ rare Deuxu-ò. Xiwena rÿsÿna rirÿsÿykeki aõ aõkõ rare. Uritere kia nohõtidu dee ibinare. Tiiboho riròðke. Xiwena rÿsÿnarÿsÿ òraru-ki aijoiò bibedewonyhenylau irÿsÿõmykre. <sup>15</sup>Aityhydyÿÿdu seriòreõ òbitiõmy ratxikeki tahe iru-ki arawidyÿõmy atximahã. Tamy dorihe òbitimy aõkõ heka idi röhõtinyke. Tii heka tule riwinykelemy ixidi röhõtinyke. Timy aõki teòsamy rahaõhyymyhÿre aõma, xiwena rÿsÿna-ki. Kai aõki awimy aõma awityhy irÿsÿõmykre Deuxu Riòreõ dibinadÿÿnyke lau wahe, Kristu dori iòraru-ki rurure. <sup>16</sup>Kaki awimy òbitimy mahakeki. Biwinykeki inywitxiraru-ki atxikeki, kia tai uritere rieryõmy aki rahake. <sup>17</sup>Riromimyhÿrenyre, riõmyhÿrenyre — kia Deuxu Iòlõna dee aõ aõkõ rare. Aõmale tahe rökòhõtintythyymyhÿreny: wiòhedÿÿna, ywina eysana. Deuxu Tytybytyhy inydeereny wahidyÿÿna wahe. <sup>18</sup>Kia wese iny rÿyikeki heka Deuxu dee wina rare, inydee tule. <sup>19</sup>Wii rikiwìohenanymyhÿrenyke ibutumy wiwesehyyle ywina-di. Tai iny tyhynareny rikikyhyhanyrenykemy. <sup>20</sup>Rÿsÿna òraru-ki aõhe wisÿdÿÿ renyõmy, butumy dori Deuxu riwinyre. Kia inyò iòraru-ki aõwitxiramy röhõtinykeki tahe ibinare. <sup>21</sup>Aõ dee rÿsÿ vÿi momo heka ibinare, tai tii rexìòrarunykeki aòraru-ki urile bexijjõnybenyke. <sup>22</sup>Kaa biwinykeki timybo Deuxu dee òbiti relemyhÿre, urile ibutu-ò tuu rybeõmy iny bedeòby, kia ira-ki aõ ibinakõre. <sup>23</sup>Ijò urihimiyò tatyhynmy ratximyhÿre heka iximy riatyke. Adee tahe òbiti heka rare. Aõbo riwinyre heka òraruna rare. Tai iwidÿÿõmy.

**15** <sup>1-2</sup>Iny ixira-di heka rökòhõtintyrenyke ibutumy aõbo iny riwinymyhÿredi. Idi rökòhõtintymyhÿrenyke inywitxira aõlaubo ruberumyhÿré. Iny òbiti erykõ mahãdu-di. <sup>3</sup>Kristu dori kaki raremyhÿy ixideewimy aõkõ tuu riwinymy raremyhÿ. Wiwana ritidyÿÿdu wesemy riki riritinymyhÿre: nade aõhòkÿmydÿÿnana-ò tai heka bede-ò nade. Riòludunyre heka aõbo iòludu aõbinabinahãkÿ rarybere heka riwaòludunymy raremy. <sup>4</sup>Tuheka roimyhÿre ihetxi Tyritina-ki inywiòhedÿÿna reny. Iny heka ribedeerydymyhÿrenyre ywina-di rakatxirenykemy rikiraòrenyke heka Deuxu aõmy bede dÿÿnana wahe. Rahykyu òraru rahykyu wahe rubu. <sup>5</sup>Tii heka wadee awire wii biwiòhenanyke. Deuxu anawiòhenanykemy adireny watxireri. Iwese Jesuisi Kristu riwinyre wese.

<sup>6-7</sup>Iluu ratxirenykemy irumy wiluumy matxibenykemy. Iny sohoji sohoji raraykinyke Jesuisi Kristu rayky wese-di. Ityby Deuxu rayky wese-di rÿyike òbitimy. Tai tahe inyboho ywinala rekealàmymyhÿre Deuxu-ò, tii Jesuisi Kristu tybyreki wahe. <sup>8</sup>Deuxu ihetxi mahãdu òraru-ki Jesuisi Kristu heka judeu mahãdu deòdurenymy ioxisÿnyre. <sup>9</sup>Iwese rybetyyritityhy rarybere wese: —Idi judeukõdu mahãdu Deuxu riwowydynkemy. Tai adee ariwiunykre judeukõdu mahãduy-ki. Jesuisi Kristu heka nade inatyhy riteòsinykemy. Judeu mahãdu

riwiòhenanykremy Jesuisi Kristu nade. <sup>10</sup>Kiamy heka roire wiuna Ritidỹỹ-ki kia rarybere. Àlana adee ariwahinykre wiuna-ki judeukõdu mahãduy-ki ani-di arawiunykre. Ijõ-ki tulekre: —Tuheka wiuna-ki raritidỹỹ roimyhỹre judeukõdu mahãdu beysake wa judeu mahãdu-wana. <sup>11</sup>Ijõ-ki kiamy roire: —Àlana heka biwahinykemy Inyryrỹ-ò idi watzireri, kaiboho tule judeukõdu mahãdu. <sup>12</sup>Deuxu dee rybeduõ, Isaia tuu rarybere: —Rexiriòkõremy heka irybe roimyhỹre. Ijese riòkõre wahe. Tii judeukõdu mahãdu iòlòmny ronykre. Tiile heka riraòmny roimyhỹkre. <sup>13</sup>Jiarỹ rexitðenyre, Paulo, kaiboho, Deuxu heka arateysanyrenykre sówemy ywina-di, tyhydỹỹna-di. Kiamy heka adireny heka watzireri, waseriòreboho. Jiarỹ heka rexitðenyhy watzimyhỹré Deuxu arawiòhenanykemy adeereny rexiterenmy watziwãhare. Deuxu Tyytybytyhy ruruna-di raròsõna-di adeereny kidiwahinykemy watzireri.

<sup>14</sup>Kaiboho òbitimy ahãtenyete waityhydỹỹdu seriòreboho. Sówemy aõna aõna witzira teertyentye. Inywitzira bibedeerynybenyke dori teertyentye. <sup>15</sup>Ihãrele taheka atxireny wanohõti reare inatyhmy tai warybe rewahiny Deuxu riwatyhynmy kawese riwasỹnyreki. <sup>16</sup>Biwateðnyke taheka judeukõdu mahãdu-ò. Jesuisi Kristu dori riwatare tadeòdumy idi judeukõ mahãdudikemy. Iu Deuxu rybe wihikỹmy rarybemyhỹreu, xiwena wahidỹỹdu wese rare. Kia tahe judeukõdu mahãdu Deuxu-ò awike. <sup>17</sup>Tai tahe Jesuisi Kristu-wana rexibesanymyhỹre Deuxu-ki waaòmmysỹdỹỹna òraru-ki. <sup>18</sup>Jesuisi Kristu Rybewihikỹ tỹmyra-di rareri. Rexitðenmy rare adeereny. Tai kaiboho òbitimy teletentye Deuxu Tyytybytyhy òraru-ki wahe. Wadeysamy heka watziwãhare. Jesuisi Kristu adeereny riwinyreki wahe. Jiarỹ reerykõre iwitzira mahãdu-di. Tahe aõma waaomydỹỹnana reeryre. Tiu dori biwawiòhenanyke judeukõdu mahãdu aritakemy. Deuxu mahãdu judeukõdu rarekemy. Òbitimy ikoreny-ki raremyhỹ. <sup>19</sup>Rybe wihikỹmy rybe-di rarewãhã tamyreny. Aõna aõna wiihikỹ irureny-ò rewinywãhare. Deuxu Tyytybytyhy-di Jerusalẽ hãwã-ribi heka rybe-di rare. Iliri bede-ò wahe. Ibutumy bede bedemy rarybere. Jesuisi Rybewihikỹmy. Ibutumy waaòmmysỹdỹỹna rewinyre, Deuxu wadee riwahinyre wahe. <sup>20</sup>Ihãre tahe ararybekemy watzireri tiu iny roholakõmyhỹre mahãdu-ò. Ijõõ dohodỹỹna iny ritohodỹỹnymyhỹre. Tai ikomy ararybekemy ixidi watzireri. <sup>21</sup>Isaia dori kia Tyyriti roire: —Tiu iny tamy roholakõmyhỹre tamy ijohonaòmny rarybere. Tai rierymyhỹre. Tai tahe roholakre tahe rityhynkre.

<sup>22</sup>Tai heka raraõlemy watziwãhare —adeereny. <sup>23</sup>Katahe kaki rexihumy waaòmmysỹdỹỹ ratzireri. Katahe arorarenmy arake watzireri beòrakõle arakemy ixidi watzireri. <sup>24</sup>Espanha bede-ò arakemy watzireri. Arakreu dori Roma-ò aroramy heka arakre. Iribi inyboho ibutumy rakatzimyhỹreu tahe tako-ò biwaixidỹỹnybenykre. <sup>25</sup>Ikoki taheka wahidỹỹõ ariwykre Jerusalẽ-ò. Jerusalẽ hãwã mahãdu dori aõhõkỹmy rotỹỹnymy rỹiramyhỹ. <sup>26</sup>Macedonia bede-ki Akaia bede-ki tamy nieruõ riwahinykremy ratzireri dohodỹỹna mahãduõ kia rama rahureri mahãdu wahe. <sup>27</sup>Tiiboho riwiòhenanyre deysana-di. Kia òbiti rare. Iribi tahe Deuxu rybe aõmydỹỹnana, Judeu mahãdu-ribi nade. Tai tahe

judeukõdu mahādu, tule judeu mahādu riwòhenanymyhÿke taaõwiwi-di. <sup>28</sup>Kaa nieru-di arakreu, tahe aroramy arehemynykre. Iribi Espanha-ò arakre. <sup>29</sup>Tuu awana watzikreu, tahe teysamy Inynyrÿ-di rakatzikre.

<sup>30</sup>Bexitðenyke wadee waõmysÿdÿÿna sõwemy watzireri ariwinykremy. Deuxu Tyytybytyhy heka sõwemy wadee nade adeereny ariwahinykremy, luuna sõwemy adeereny ariwahinykre. <sup>31</sup>Tule ityhydÿÿdukõdu mahādu Judeia wadee aõbinahākÿ wadi ratximyhÿre. Wadi bexitðenybenyke jiarÿ iribi arahenykre. Tule kaa nieru rewyreri waribi teysamy rimyrenykre. <sup>32</sup>Tai tahe awanareny tahe wadeysamy arehemynykre Deuxudeewikeki. <sup>33</sup>Deuxudeewikeki wii riki Deuxu ywina adeereny watzireri. Kie.

**16** <sup>1-2</sup>Fibi hāwyy ityhydÿÿdu seriðreõ adee rakre. Tii heka Sekrea hāwā ludu dohodÿÿna mahāduõ rare. Tii heka dohodÿÿdu mahādu riwòhenanymyhÿre aõu aõu aityhydÿÿdu seriðre wesemy. Tii kaiboho biwòhenanykre, tii dori sõwemy riwawòhenanyre.

<sup>3</sup>Birybedÿÿnyke Prisila Akila-wana. Tii wawòhenadÿÿdureny. <sup>4</sup>Tii wadee sõwemy riwinyre rubu lau ruberuõtyhy. Tai jiarÿ reālāwāhare tamy, tule tuu ibutuma Judeukõdu dohodÿÿna mahādu. Iheto dohodÿÿna mahāduõ warybe wehityhyna biwahenyre. <sup>5</sup>Epenetu-ò biwehityhyny. Tii ibutumy ityhydÿÿdu-ribi juhuule rityhynyre Asia bede-ki. Tii wabiõwa rare. <sup>6</sup>Marie adeereny raaõmysÿdÿÿtyhyre. Biwehityhyna wanimy. <sup>7</sup>Adroniko, Junia wana biwehityhynanykre. Tiiboho judeu mahāduõ roire. Rõtenawo-ki wawana roiremyhÿ. Dohodÿÿna mahādu rierytyhyre. Deuxu deòdÿÿna mahādu heka wakomy rityhynyre. <sup>8</sup>Ijõ waityhydÿÿdu biõwa Ampliato inire. Tamy kanarybekre tule. <sup>9</sup>Urbano, Estaki-wana tule Kristu dee wawòhedÿÿdu tule rybe wehityhyna tamy biwahinyke. <sup>10</sup>Apele heka ityhydÿÿdu tyhy rare. Biwehityhynanyke. Aristabulo-wana heto woludu mahādu biwehityhynanykre warybe tamy. <sup>11</sup>Tule biwehityhynanykre Herodiaõ — wajioiõ tii rare judeu mahāduõ wahe. Kristu dee dori kia iny õbiti rare. Narciso heto ludu ityhydÿÿduõ heka tule biwehityhynanykre warybe tamy. <sup>12</sup>Tule Trifena, Trifosa, Peside-wana raaõmysÿdÿÿmy Inynyrÿreny-ò biwehityhynanykre wary tamy. <sup>13</sup>Rufu tule Deuxu dee aõmysÿdÿÿdu rare ise tule. Tii dori nadi wesemy riwawisinanyre. <sup>14</sup>Asincrito, Flegonte, Hermes, Paroba, Hermas, tule biwehityhynanykre ityhydÿÿdu mahādu. <sup>15</sup>Filologo, Julia-wana, Nereu taseriðre-wana, Olimpa, ityhydÿÿdu mahādu tii-wana ratxireri ibutu-ò warybe wehityhyna. <sup>16</sup>Ibutumy aseriðre debò bimyke biwehityhynanybenykre ibutumy. Ibutumy Kristu tydÿÿdu mahādu-ò arawawehityhynanykre. Tule kaki dohodÿÿna irybe wehityhynanyre adeereny riwahinyreri.

<sup>17</sup>Rybeõ roire kaa rybe tyyriti ixiydynako-ki. Ijõ aõhe dÿÿnana doimyhÿde kia hetowo hitxina-ki. Iwitxiramy heka taerydÿÿna mahādu — iwese inydeereny erydÿÿnamyhÿre wesemy aõkõ kia lau tahe bexiebenyke. <sup>18</sup>Aõ Jesuisi dee aõkõ raaõmysÿdÿÿnyre. Ixidee tule heka raaõmysÿdÿÿmyhÿre aõ ixidee ritarenykemy rōhõtinyinmyhÿreny. Tiiboho heka rarybewihikÿmyhÿreny, aõma, ruikedÿÿmy timy bede erykõ tuu ratximyhÿreny. <sup>19</sup>Jiarÿ wadeysamy watzireri kaiboho



òbitimy ibutumy toiteki. Araerywãhã jiarỹboho aõbo òbitire uritere aõbina widdyõmy. <sup>20</sup>Deuxu ywisidỹyna wahidyyna dori Satanasi riixãwididỹnyke. Jesuisi Kristu Inynyrỹ wiðhedỹyna adeereny riwahinykemy idi watzireri.

<sup>21</sup>Tximòtxi dori wawiðhedỹydu rare. Lucio, Ijasõ, Sosipatu, wajudeuijoi-wana tule adeereny irybe wehityhyna riwahinyre. <sup>22</sup>Jiarỹ, heka Tercio, reritinyreri aõbo Paulo rarybere adeereny. Jiarỹ adeereny warybe wehityhyna rewahinyreri. <sup>23</sup>Jiarỹ heka Kaio heto-ki watzireri, dohodỹyna rabutunyreki watzireri. Kaio irybe wehityhyna adee riwahinyre. Tule Erasto hãwã nieru rubudỹydu rare. Tule Quarto inyseriðereny rare. Ibutumy heka kaa irybe weityhyna adeereny rewahinyrenyreri. <sup>24</sup>Inynyrỹ Jesuisi Kristu ruxetõena ibutumy adeereny kanakemy idi watzireri. Kie.

<sup>25</sup>Deuxu irurutyhy-di rare. Tii heka adi riyrubunykemy adi watzireri. Iwese rybeweityhyna rarybere wesemy, ruru adee riwahinykre. <sup>26</sup>Kaheka Deuxu tarasana rare. Ibutumy iny mahãdu kaa tarasana rare. Katahe wiji ibutumy Deuxu rybemy rybena reamyhỹre. Iwese Deuxu rybedu mahãdu juhoo rarybere wesemy. Deuxu heka ibutu-ò tuu rarybere. Tai tahe ibutumy iny Deuxu Tyytybytyhy rierykre tule rityhinykre. <sup>27</sup>Deuxu-ò àlàna biwahinykeki tii dori bedeeryna ratximyhỹre Jesuisi Kristu òraru-ki wowydyna tamy biwahinybenykre aõu aõu. Kie, Paulo.